

歷朝

部說種五十三百一

觀大

# 古今說海

明雲間陸氏原編

集成圖書公司印行

集已



編三第淵說



上海图书馆藏书



明  
靈  
閩  
陸  
氏  
原  
編

說  
淵

集  
成  
圖  
書  
公  
司  
印



宣統元年季冬月  
第二次印於上海

# 古今說海

聶隱娘傳

說淵三十六 別傳三十六

聶隱娘者唐貞元中魏博大將聶鋒之女也方十歲有尼乞食於鋒舍見隱娘悅之乃云問押衙乞取此女鋒大怒叱尼尼曰任押衙鐵櫃中盛亦須偷去矣及夜果失隱娘所在鋒大驚駭令人搜尋曾無形響父母每思之相對啼泣而已後五年尼送隱娘歸告鋒曰教已成矣可自領取尼歎亦不見一家悲喜問其所習曰初但讀經念呪餘無他也鋒不信懇詰隱娘曰真說又恐不信如何鋒曰但真說之乃曰隱娘初被尼挈去不知行幾里及明至大石穴中嵌空數十步寂無居人猿猱極多尼先已有二女亦各十歲皆聰明婉麗不食能於峭壁上飛走若捷猱登木無有蹶失尼與我藥一粒兼令執寶劍一口長一二尺許鋒利吹毛可斷遂令二女教某攀緣漸覺身輕如風一年後刺猿猱百無一失後刺虎豹皆決其首而歸三年後能使刺鷹隼無不中劍之刃漸減五寸飛走遇之不知其來也至四年畱二女守穴挈我於都市不知何處也指其人者一一數其過曰爲我刺其首來無使知覺定其膽非若鳥

之容易也授以羊角匕首刃廣三寸遂白日刺其人於都市中人莫能見以首入囊返命則以藥化之爲水五年又曰某大僚有罪無害人若干夜可入其室決其首來又攜匕首入室度其門隙無有障礙伏之梁上至暝時得其首而歸尼大怒曰何太晚如是某云見前人戲弄一兒可愛未忍便下手尼叱曰已後遇此輩必先斷其所愛然後決之某拜謝尼曰吾爲汝開腦後藏匕首而無所傷用卽抽之曰汝術已成可歸家遂送還云後二十年方可一見鋒聞語甚懼後遇夜卽失蹤及明而返鋒已不敢詰之因茲亦不甚憐愛忽值磨鏡少年及門女曰此人可與我爲夫白父又不敢不從遂嫁之其夫但能淬鏡餘無他能夫乃給衣食甚豐具數年後父卒魏帥知其異遂以金帛召署爲左右吏如此又數年至元和間魏帥與陳許節度使劉悟參商不協使隱娘賊其首隱娘辭帥之許許帥能神算已知其來召牙將令曰早至城北候一丈夫一女子各跨白黑衛至門遇有鵠來噪丈夫以弓彈之不中妻奪夫彈一丸而斃鵠者揖之云吾欲相見祇迎也衛將受約束遇之隱娘夫妻曰劉僕射果神人不然者何以動召也願見劉公劉勞之隱娘夫妻拜曰得罪僕射合萬死劉

曰不然各親其主人之常事魏今與許何異請當畱此勿相疑也隱娘謝曰僕射左右無人願舍彼而就此服公神明耳蓋知魏帥之不及劉也劉問其所須曰每日只要錢二百文足矣乃依所請忽不見二衛所在劉使人尋之不知所向後潛於布囊中見二紙衛一黑一白後月餘白劉曰彼未知止必使人繼至今宵請剪髮繫之以紅綃送於魏枕前以表不回劉聽之至四更却返曰送其信矣是夜必使精精兒來殺某及賊僕射之首此時亦萬計殺之乞不憂耳劉豁達大度亦無畏色是夜明燭半宵之後果有二幡子一紅一白飄飄然如相擊於床四隅良久見一人自空而踏身首異處隱娘亦出曰精精兒已斃拽出於堂之下以藥化爲水毛髮不存矣隱娘曰後夜當使妙手空空兒繼至空空兒之神術人莫能窺其用鬼莫得躡其蹤能從空虛入冥莫無形而滅影隱娘之藝故不能造其境此卽繫僕射之福耳但以于闐玉周其頸擁以衾隱娘當化爲蟻蠊潛入僕射腸中聽伺其餘無逃避處劉如言至三更瞑目未熟果聞項上鏗然聲甚厲隱娘自劉口中躍出賀曰僕射無患矣此人如俊鷲一搏不中卽翩然遠逝耻其不中耳纔未逾一更已千里矣後視其玉果有

七首劃處痕逾數分自此劉轉厚禮之自元和八年劉自許入覲隱娘不願從焉云自此尋山水訪至人但一一請給與其夫劉如約後漸不知所之及劉薨於軍隱娘亦鞭驢而一至京師柩前慟哭而去開成年昌裔子縱除陵州刺史至蜀棧道遇隱娘貌若當時甚喜相見依前跨白衛如故謂縱曰郎君大災不合適此出藥一粒令縱吞之云來年火急拋官歸洛方脫此禍吾藥力只保一年患耳縱亦不甚信遺其繒綵隱娘一無所受但沉醉而去後一年縱不休官果卒於陵州自此無復有人見隱娘矣

# 古今說海

## 袁天綱外傳

說淵二十七 別傳三十七

袁天綱蜀郡成都人父瓊梁州司倉祖嵩周朝歷犍爲蒲陽蒲江二郡守車騎將軍曾祖達梁朝江黃二州刺史周朝歷天水懷仁二郡守天綱少孤貧好道藝精於相術唐武德年中爲火井令貞觀六年秩滿入京太宗召見謂天綱曰巴蜀古有嚴君平朕今有爾自顧何如對曰彼不逢時臣遇聖主臣當勝也隋大業末竇軌客遊劍南德陽縣與天綱同宿以貧苦問命天綱曰公額上伏犀貫玉枕輔角又成就從今十年後必富貴爲聖朝良佐右輔角起兼復明淨當於梁益二州分野大振功名軌曰誠如此言不敢忘德初爲益州行臺僕射既至召天綱謂曰前於德陽縣相見豈忘也深禮之更請爲審天綱瞻之良久曰骨法成就不異往時然目色赤脉貫童子語浮面赤爲將多殺人願自誠後果多行殺戮武德九年軌被徵詣京謂天綱曰更得何官對曰面上家人坐位不動輔角右畔光澤更有喜色至京必蒙聖恩還來此任其年果重授益州都督天綱初至洛陽在清化坊安置朝野歸轅人物常滿是時



杜淹王珪韋挺三人來見天綱謂淹曰蘭臺成就學堂寬廣謂珪曰公法令成就天地相臨從今十年當得五品要職謂挺曰公面似大獸之面文角成就必得貴人攜接初爲武官又語杜淹曰二十年外終恐三君同被責黜暫去卽還淹尋遷侍御史武德中爲天策府兵曹文學館學士王珪爲隱太子中允韋挺自隋末隱太子引之爲率更武德六年俱配流寓州淹等至益州見天綱泣曰袁公前於洛陽之言皆如高旨今日形勢如此更爲一看天綱曰公等骨法大勝往時不久卽回終當俱享榮貴至九年六月俱追入又過益州造天綱天綱曰杜公至京卽得三品要職年壽非天綱所知王韋二公在後當得三品兼有壽然晚途皆不稱遂韋公尤甚及淹至京拜御史大夫檢校吏部尙書贈天綱詩曰伊呂深可慕松喬定是虛繫風終不得脫歷欲安如且珍執素美當與薛蘿疎旣逢揚得意非復久閒居王珪尋爲侍中出爲同州刺史韋挺歷蒙州刺史並卒於官皆如天綱之言貞觀中勅追詣九成宮於時中書舍人岑文本令視之天綱曰舍人學堂成就眉復過目文才振於海內頭有生角猶未大成後視之全無三品前視三品可得然四體虛弱骨肉不相稱得三品恐

是損壽之徵後文本官至中書令尋卒房玄齡與李審素同見天綱房曰李恃才傲物君先相得何官天綱云五品未見若六品已下清要官有之李不復問云視房公得何官天綱云此人大富貴公若欲得五品卽求此人李不之信後房公爲宰相李爲起居舍人卒高宗聞往言令房贈五品官房奏贈諫議大夫申公高士廉謂天綱曰君後更得何官天綱曰自知相祿已絕不合更有恐今年四月大厄果不過是月而卒也蒲州刺史蔣儼幼時天綱謂曰此子當累年幽禁後大富貴從某官位至刺史年八十三其年八月五日午時祿絕儼後征遼東沒賊囚於地穿七年高麗平定歸得官一如天綱所言至蒲州刺史八十三謂家人曰袁公言我八月五日祿絕其死矣設酒饌與親故爲別果有勅至放致仕遂停祿後數年卒李義甫僑居於蜀天綱見而奇之曰此郎貴極人臣但壽不長耳因請舍之託其子謂李曰此子七品相願公提挈之義甫許諾因問天綱壽幾何對曰五十二外非所知也義甫後爲安撫使李大亮侍中劉洎等連薦之召見試令詠烏立成其詩曰日裏颺朝彩琴中伴夜啼上林許多樹不借一枝棲太宗深賞之曰我將全樹借汝豈唯一枝自門下典儀

超拜監察御史其後位壽皆如天綱之言贊皇公李嶠幼有清才昆弟五人皆年不過三十而卒唯嶠已長成矣母憂之益切請天綱天綱曰郎君神氣清秀而壽若不永恐不出三十其母大以爲戚嶠時名振威望貴達聞此言不信其母又請袁生致饌診視云定矣又請同於書齋連榻而坐寢袁登牀穩睡李獨不寢至五更忽睡袁適覺視嶠無喘息以手候之鼻下氣絕初大驚怪良久偵候出入息乃在耳中撫而告之曰得矣遂起賀其母曰數候之皆不得今方見之矣郎君必大貴壽是龜息也貴壽而不富耳後果如其言則天朝拜相而家常貧是時帝數幸相宅見嶠臥青絨帳帝歎曰國相如是乖大國之體賜御用綉羅帳焉嶠寢其中達曉不安覺體生疾遂自奏曰臣少被相人云不當華腴故寢不安焉帝嘆息久之任意用舊者嶠身材短小鼻口都無厚相時議不以重祿待之其在潤州也充使宣州山採銀時妄傳其暴亡舉朝傷歎冬官侍郎張詢古嶠之從舅也聞之甚憂使諸親訪候其實適會南使云亡實矣詢古潛然涕泗朝士多相慰者時有一人稱善骨法頗得袁天綱之術朝貴多竊問之其人曰久知李舍人祿位稍薄諸人竦威其人又曰李舍人雖有

才華而儀冠耳目鼻口略無成就者頃見其加朝散已憂之矣衆皆然之嶠竟三秉衡軸極人臣之貴然則嶠之相難知而天綱得之又陝州刺史王當有女集州縣文武官令天綱揀婿天綱曰此無貴婿惟識果毅姚某者有貴子可嫁之終必得力當從其言嫁之時人咸笑焉乃元崇也時年二十三好獵都未知書嘗詣一親表飲遇相者曰公後必富貴言訖而去姚追而問之相者曰公甚貴爲宰相歸以告其母勸令讀書崇遂割放鷹鷄折節勤學以挽郎入仕竟位至宰相天綱有子客師傳其父業所言亦驗客師官爲廩犧令顯慶中與賈文通同供奉高宗以銀合合一鼠令諸術數人射之皆言有一鼠客師亦曰鼠也然入一出四啟合中已生三子果有四矣客師常與一書生同過江登舟訖遍視舟中人顏色謂同侶曰不可速也遂相引登岸私語曰吾視舟中數十人皆鼻下黑氣大厄不久豈可從之且少畱舟未發間忽見一丈夫神色高朗跛一足負擔驅驢登舟客師見此人乃謂侶曰可以行矣貴人在內吾儕無憂矣登舟而發至中濤風濤忽起危懼雖甚終濟焉詢驅驢丈夫乃是婁師德也後位至納言焉

袁天綱外傳終

# 古今說海

曾季衡傳

說淵三十八 別傳三十八

太和四年春鹽州防禦使曾孝安有孫曰季衡居使宅西偏院室屋壯麗而季衡處之有僕夫告曰昔王使君女暴終於此乃國色也晝日其魂或見於此耶君慎之季衡少年好色願覩其靈異終不以人鬼爲間頻炷名香頗疎凡俗閒遊闔處恍然凝思一日晡時有雙鬟前揖曰王家小娘子遣某傳達厚意欲面拜耶君言訖瞥然而沒俄頃有異香襲衣季衡乃束帶伺之見嚮者雙鬟引一女而至乃神仙之人也季衡揖之問其姓氏曰某姓王氏字麗真父今爲重鎮昔時從大人牧此城處此室無何物故感君思深竊冥情激幽壤所以不間存沒頗思神會其來久矣但非吉日良時今方契願幸垂留意季衡畱之款會移時乃去握季衡手曰翌日此時再會慎勿泄於人遂與侍婢俱不見自此每及晡一至近六十餘日季衡不疑因與大父麾下將校說及艷麗誤言之將校怛然驚其事曰耶君將及此時願一扣壁某當與一二輩潛窺焉季衡亦終不能扣壁是日女郎一見季衡容色慘沮語聲嘶咽握季衡手

曰何爲負約而泄於人自此不可更接歡笑矣季衡慙悔無詞以應女曰殆非君之過亦冥數盡耳乃畱詩曰五原分袂真胡越燕拆鶯離芳草竭年少煙花處處春北邙空恨清秋月季衡不能詩耻無酬乃強爲一篇曰莎草青青鴈欲歸玉腮珠淚灑臨歧雲鬢飄去風香盡愁見鶯啼紅樹枝女遂於襦帶解盛金結花合子又抽翠玉雙鳳翹一隻贈季衡曰望異日覩物思人無以幽冥爲隔季衡搜書篋中得小金鏤花如意酬之季衡曰此物雖非珍異但貴其名如意願長在玉手操持耳又曰此別何時更會女曰非一甲子無相見期言訖嗚咽而沒季衡自此寢寐求思形體羸瘵故舊丈人王回推其方術療以藥石數月方愈乃詢五原緝針婦人曰王使君之愛女不疾而終於此院今已歸塋北邙山或陰晦而魂遊於此人多見之則女詩云北邙空恨清秋月者言其塋處耳

曾季衡傳終

# 古今說海

## 蔣子文傳

說淵二十九 別傳三十九

蔣子文廣陵人也嗜酒好色佻健無度常自謂骨青死當爲神漢末爲秣陵尉逐賊至鍾山下賊擊傷額因解綬縛之有頃遂死及吳先主之初其故吏見文於道乘白馬執白羽侍從如平生見者驚走文追之謂曰我當爲此土地神以福爾下民爾可宣告百姓爲我立祠不爾將有大咎是歲夏大疫百姓輒相恐動頗有竊祀之者矣文又下巫祝吾將大啓祐孫氏官宜爲吾立祠不爾將使蟲入人耳爲災俄而有小蟲如鹿蟲入人耳皆死醫不能治百姓愈恐孫主未之信也又下巫祝若不祀我將有大火爲災是歲火災大發一日數十處火及公宮孫主患之議者以爲鬼有所歸乃不爲厲宜有以撫之於是使使者封子文爲中都侯次子緒爲長水校尉皆加印綬爲廟堂轉號鍾山爲蔣山今建康東北蔣山是也自是災厲止息百姓遂大事之陳郡謝玉爲琅琊內史在金城其年虎暴殺人甚衆有一人以小船載年少婦以大刀挿著船挾暮來至邏將出語云此間頃來甚多草穢君載細小作此輕行大爲不



易可止邏宿也相問訊既畢邏將適還去其婦上岸便爲虎取去其夫拔刀大喚欲逐之先奉事蔣侯乃喚求助如此當行十里忽覺如有一黑衣人爲之導其人隨之當復二十里見大樹既至一穴虎子聞行聲謂其母至皆走出其人卽其所殺之便挾刀隱樹住良久虎方至便下婦著地倒牽入穴其人以刀當脚斫斷之虎既死其婦故活向曉能語問之云虎初取便負著背上臨至而後下之四體無他正爲草木傷耳扶歸還船明夜夢一人語之云蔣侯使助汝知否至家殺豬祠焉會稽鄞縣東野有女子姓吳字望子年十六姿容可愛其鄉里有解鼓舞神者要之便往緣塘行半路忽見一貴人端正非常貴人乘船手力十餘整頓令人問望子欲何之具以事對貴人云我今正往彼便可入船共去望子辭不敢忽然不見望子既拜神坐見向船中貴人儼然端坐卽蔣侯像也問望子來何遲因擲兩橘與之數數形見遂隆情好心有所欲輒空中下之常思噉鱸一雙鮮鯉隨心而至望子芳香流聞數里頗有神驗一邑共事奉經三年望子忽生外意神便絕往來咸甯中太常卿韓伯子某會稽內史王蘊子某光祿大夫劉耽子某同遊蔣山廟廟有數婦人像甚端正某等醉

各指以戲相配匹卽以其夕三人同夢蔣侯遣傳教相聞曰家子女並醜陋而猥垂榮顧輒刻某日悉相奉迎某等以其夢指適異常試往相問而果各得此夢符協如一於是大懼備三牲詣廟謝罪乞哀又俱夢蔣侯親來降已曰君等既已顧之實貪令對尅期垂及豈容方更中悔經少時並亡劉赤斧者夢蔣侯召爲主簿期日促乃往廟陳請母老子弱情事過切乞蒙放恕會稽魏過多材藝善事神請舉過自代因叩頭流血廟祝曰特願相屈魏過何人而有斯舉赤斧固請終不許尋而赤斧死焉孫恩作逆時吳興紛亂一男子忽急突入蔣侯廟始入門木像彎弓射之卽卒行人及守廟者無不皆見也中書郎王長豫有美名父丞相導至所珍愛遇病轉篤導憂念特至正在北床上坐不食已積日忽見一人形狀甚壯者著鎧執刀王問君是何人答曰僕是蔣侯也公兒不佳欲爲請命故來耳勿復憂王欣喜動容卽求食食遂數斗內外咸來達所以食畢忽復慘然謂王曰中書命盡非可救者言終不見也

蔣子文傳終



# 古今說海

## 張遵言傳

說淵四十別傳四十

南陽張遵言求名下第途次商山山館中夜晦黑因起廳堂督芻秣見東墻下一物凝白曜人使僕者視之乃一白犬大如貓鬚睫爪牙皆如玉毛彩清潤瑩澤可愛遵言憐愛之目爲捷飛言駿奔之捷甚於飛也常與之俱初令僕人張志誠袖之每飲飼則未嘗不持目前時或飲食不快則必伺其嗜而噉之苟或不足甯自輟味不令捷飛不足也一年餘志誠袖行意以懈倦由是遵言每行自袖之飲食轉加精愛夜則同寢晝則同處首尾四年後遵言因行於梁山路日將夕天且陰未至所詣而風雨驟來遵言與僕等隱大樹下於時昏晦默無所覩忽失捷飛所在遵言驚歎命志誠等分頭搜討未獲次忽見一人衣白衣長八尺餘形狀可愛遵言豁然如月中立各得辯色問白衣人何許來何姓氏白衣人曰我姓蘇第四謂遵言曰我已知子姓字矣君知捷飛去處否則我是也君今災厄合死我緣受君恩深四年已來能待我至於盡力輟味曾無毫釐悔恨我今誓脫子厄然須損十餘人命耳言訖乘遵言馬

而行遵言步以從之可十里許遙見一塚上有三四人衣白衣冠人長丈餘手持弓劍形狀瓌偉見蘇四郎俯僂迎趨而拜拜訖莫敢仰視四郎問何故相見白衣人曰奉大王帖追張遵言秀才言訖偷目盜視遵言遵言恐欲踣地四郎曰不得無禮我與遵言往還君等須與我且去四人憂悲啼泣而四郎謂遵言曰勿憂懼此輩亦不能戾君更行十里又見夜叉輩六七十人皆持兵器銅頭鐵額狀貌皆可憎惡跳梁企躑進退獰暴遙見四郎戢毒慄立惕伏戰竦而拜四郎喝問曰作何來夜叉等鬻獰毒爲戚施之顏肘行而前曰奉大王帖專取張遵言秀才偷目盜視之狀如初四郎曰遵言我之故人取固不可也夜叉等一時叩地流血而言曰在前白衣者四人爲取遵言不到大王已各使決鐵杖五百死者活者未分四郎今不與去某等盡死伏乞哀其性命暫遺遵言往四郎大怒叱夜叉夜叉等辟易崩倒者數十步外流血跳迸涕淚又言四郎曰小鬼等敢爾不然且急死夜叉等啼泣暗鳴而去四郎又謂遵言曰此數輩甚難與語今旣去則奉爲之事成矣行七八里見兵仗等五十餘人形神則常人耳又列拜於四郎前四郎曰何故來對答如夜叉等又言曰前者夜叉牛

叔良等七人爲追張遵言不到盡已付法某等惶懼不知四郎有何術救得某等全  
生四郎曰第隨我來或希冀耳凡五十人言可者半須臾至大黑門又行數里見城  
堞甚嚴有一人具軍容走馬而前傳王言曰四郎遠到某爲所主有限法不得迎拜  
於路請且於南館小休卽當邀迓入館未安信使相繼而召兼屈張秀才俄而從行  
宮室欄署皆眞王者也入門見王披袞垂旒迎四郎而拜四郎酬拜起甚輕易言詞  
唯唯而已大王盡禮前揖四郎升階四郎亦微揖而上回顧遵言曰地主之分不可  
不爾王曰前殿淺陋不足四郎居處又揖四郎凡過殿者三每殿中皆有陳設盤榻  
食具供帳之備至四重殿方坐所食之物及器用皆非人間所有食訖王揖四郎上  
夜明樓樓上四角柱盡飾明珠其光如晝命酒具樂飲數巡王謂四郎曰有佐酒者  
欲命之四郎曰有何不可女樂七八人飲酒者十餘人皆神仙閒容貌粧飾耳王與  
四郎各衣便服談笑亦隣於人間少年有頃四郎戲一美人美人正色不接四郎又  
戲之美人怒曰我是劉根妻爲不奉上元夫人處分以涉於此君子何容易乎中間  
許長史於雲林王夫人會上輕言某已贈語杜蘭香姊妹至多微言猶不敢掉謔君

何容易耶四郎怒以酒卮擊牙盤一聲其柱上明珠轂轂而落瞑然無所覩遵言良久懵而復醒元在樹下與四郎及鞍馬同處四郎曰君已過卮矣與君便別遵言曰某受生成之恩已極矣都不知四郎之由以歸感戴之所又某之一生更有何所賴耶四郎曰吾不能言汝但於商州龍興寺東廊縫衲老僧處問之可知矣言畢騰空而去天已向曙遵言遂整轡適商州果於龍興寺見縫衲老僧遂禮拜初甚拒遵言遵言求之不已夜深乃曰君子苦求焉得不應蘇四郎者太白星精也大王者仙府謫官也今居於此遵言又以事問老僧僧竟不對曰君今已離此卮矣勗遵言令歸館穀明辰尋之已不知其處所矣

# 古今說海

侯元傳

說淵四十一 別傳四十一

侯元者上黨郡銅鞮縣山村之樵夫也家道貧窶唯以鬻薪爲事唐乾符己亥歲於縣西北山中伐薪回憩谷口傍有巨石巖然若夏屋元對之太息悵己之勞也聲未絕石砉然豁開若洞中有一叟羽服烏帽髻髮如霜曳杖而出元驚愕遽起前拜叟曰我神君也汝何多歎自可於吾法中取富貴但隨吾來叟復入洞門元從之可數十步廓然清朗田疇砥平多異花芳草行數里遇橫溪碧湍流苔鴛鷓泝澗其上長梁夭矯如晴虹焉過溪北左右皆喬松修篁高門渥丹臺榭重復引元入別院坐小亭上簷楹階砌皆奇寶煥然及進食行觴復目所未覩也食畢叟退少頃二童揖元詣便室具湯沐進新衣一襲冠帶竟復導至亭上叟出命僕設淨席於地令元跪席上叟授以祕訣數萬言皆變化隱顯之術元素蠢蠢至是一聽不忘叟戒曰汝雖有少福合於至法進身然面有敗氣未除亦宜謹密自固若圖謀不軌禍喪必至且歸存思如欲謁吾但至心叩石當有應門者元因拜謝而出仍令一童送之既出洞穴



遂泯然如故視其樵蘇已失至家其父兄驚喜曰去一旬謂已卒於虎狼之吻元在洞中如一日耳又訝其服裝華潔神氣激揚元知不可隱乃爲其家人言之遂入靜室中習熟其術期月而術成能變化百物役召鬼魅草木土石皆可爲步騎甲兵於是悉收鄉里少年勇悍者爲將卒出入陳旌旆幢蓋鳴鼓吹儀比列國焉自稱曰賢聖官有三老左右弼左右將軍等號每朔望必盛飾往謁神君神必戒以無稱兵若固欲舉事宜待天應至庚子歲聚兵數千人縣邑恐其變乃列上上黨帥高公潯命都將以旅討之元馳謁神君請命神君曰旣言之矣但當偃旗臥鼓以應之彼見兵威若是必不敢內薄而攻我志之慎勿輕接戰元雖唯諾心計以爲我奇術制之有餘且小者不能抗後其大者若之何復示衆以不武也旣歸令其黨戒嚴是夜潞兵去元所據險三十里見步騎戈甲蔽山澤甚難之明方陣以前元領千餘人直突之先勝後敗酒酣被擒至上黨繫之府獄嚴兵圍守且視枷穿中唯燈臺耳失元所在夜分已達銅鞮徑詣神君謝罪君怒曰庸奴終違我教今日雖幸而免斧鑕亦行將及矣非吾徒也不顧而入鬱悒趨出復後謁神君虔心叩石石不爲開矣而其術漸

歎猶爲其黨所說是秋率徒掠并州之太谷而并騎適至圍之數重術既不神遂斬之於陣其黨與散歸田里焉

侯元傳終

古今說海  
說淵庚集  
侯元傳

# 古今說海

## 同昌公主外傳

說淵四十二 一別傳四十二

咸通九年同昌公主出降宅於廣化里錫錢五百萬貫仍罄內庫寶貨以實其宅而房櫳戶牖無不以衆寶飾之更以金銀爲井欄藥臼食櫃水槽鑪釜盆甕之屬仍縷金爲笊籬箕筐製水精火齊琉璃玳瑁等床悉支以金龜銀塹更琢五色玉爲器什合百寶爲圓案更賜金麥銀粟共數斛此皆太宗朝條支國所獻也堂中設連珠之帳却寒之簾犀簾牙席龍鳳繡連珠帳續眞珠以成也却寒簾類玳瑁斑有紫色云却寒之鳥骨所爲也則未知出在何國更有鷓鴣枕翡翠匣神絲繡被其枕以七寶合爲鷓鴣口口翡翠毛羽神絲繡被三千鴛鴦仍間以奇花異葉則精巧瑰麗可得而知矣其上綴以靈粟之珠如粟粒五色輝煥更帶蠲忿犀如意玉其犀圓如彈丸入土不朽爛帶之令人蠲忿怒如意玉類桃實上有七孔云通明之象更有瑟瑟幕紋布巾火蠶綿九玉釵其幕色如瑟瑟闊三丈長一百尺輕明虛薄無以爲比向空張之則疎朗之紋如碧絲之貫其珠雖大雨暴降不能濕漏云以蛟人瑞香膏所傅

故也紋布卽手巾也潔白如雪光軟拭水不濡用之彌年亦未嘗生垢膩二物稱得鬼谷國火蠶綿云出火州絮衣一襲用之一兩稍過度則熳蒸之氣不可近云九玉釵上刻九鸞皆九色其上有字曰玉兒工巧妙麗殆非人製有得於金陵者因以獻公主酬之甚厚一日晝寢夢絳衣奴致語云南齊潘淑妃取九鸞釵及覺具以夢中之言言於左右公主薨其釵亦亡其處韋氏異其事遂以實話於門人或曰玉兒卽潘妃小字逮諸珍異不可具載漢至唐公主出降之盛未之有也公主乘七寶步輦四面綴五色玉香囊囊中貯辟邪香瑞麟香金鳳香此皆異國獻也仍雜以籠腦金屑則鏤水晶瑪瑙辟塵犀爲龍鳳花其上仍絡眞珠玳瑁更以金絲爲流蘇雕輕玉爲浮動每一出遊則所過芬香街巷晶照看者眩惑其目是時某中貴人買酒於廣化旗亭忽相謂曰坐來香氣何太異也同席曰豈非龍腦邪曰非也余幼給事於嬪妃宮故常聞此未知今日自何而致因顧問當墟者云公主步輦夫以錦衣換酒於此中貴人共請視之益歎其異上每賜御饌湯藥則道路之使相屬其饌有消靈炙紅虬脯其酒則有凝靈漿桂花醞其茶則綠花紫英之號消靈炙一羊之肉取之四

兩雖經暑毒終不臭敗紅虬脯非虬也但貯於盤中虬健如紅絲高一丈以筋抑之無三數分撤卽復其故迨諸品味人莫能識而公主家人饜飫如里中糠粃一日大會韋氏之族於廣化里玉饌俱陳暑氣將甚公主命取澄水帛以蘸之挂於南軒滿座則皆思挾纊澄水帛長八九尺似布輕細明薄可鑑云其中有龍涎故能消暑也韋氏諸宗好爲葉子戲夜則公主以紅琉璃盤盛夜光珠令僧祇捧立堂中而光明如晝焉公主始有疾召術士來竇爲燈法乃以香蠟燭遺之來氏之隣人覺香氣異常或詣門詰其故竇則具以事對其燭方二寸其上被五彩文卷而爇之竟夕不盡郁烈之氣可聞於百步餘煙出其上卽成樓閣臺殿之狀或云燭中有蜃脂也公主疾旣甚醫者欲難藥餌奏云得紅蜜白猿膏食之可愈上令訪內庫得紅蜜數石本兜離國所貢白猿膏數甕本南海所獻也雖日如餌終無其驗公主薨上哀痛甚遂自製挽歌詞令百官繼和及庭祭日百司與內官皆用金於飾車輿服玩以焚於韋氏庭韋家爭取灰以擇金寶及葬於東郊上與淑妃御延輿門出內庫金玉駝馬鳳凰麒麟各高數尺以爲儀其衣服玩具與人無異一物以上皆至一百二十昇刻木

爲樓殿龍鳳花木人畜之象者不可勝計以絳羅裙繡絡金銀瑟瑟爲帳幕者千隊結爲幢節傘蓋彌街翳日旌旗珂珮鹵簿率多加等以賜紫尼及女道士爲侍從引翼則焚昇霄靈芝香而擊歸天紫金之碧磬繁華輝煥殆餘二十里上賜酒一斗斛餅啗三十駱駝各徑闊二尺飼役夫也京城士庶罷業來觀者流汗相屬唯恐居後及靈阜過延興門上與淑妃慟哭中外聞者無不傷痛同日葬乳母上更作祭乳母文詞質而意切人多傳寫是後上日夕惴心挂意李可又歎追百年曲聲詞怨切聽之莫不淚下更教千數人作歎百年隊取內庫珍寶雕成首飾畫八百匹官綾作魚龍波浪文以爲地衣而舞一舞珠翠滿地可及官厯大將軍賞賜盈萬甚無狀左軍容使西門季玄素所梗直乃謂可及曰爾恣巧媚以惑天子族無日矣可及恃寵未嘗改作可及善嚙喉舌於天子前弄眼作頭腦連聲著詞唱雜聲曲須臾則百數不休是時京城不調少年相效謂之拍彈去聲一日可及乞假爲子娶婦上曰卽令送酒麪及米以助汝嘉禮可及歸至舍見一中貴人監二銀榼各高二尺餘宣賜可及始謂之酒及封啓皆實中也上賜可及銀麒麟高數尺可及取官庫車載往私第西門

季玄曰今日受賜吏用官車他日破家亦須輦還內府不道受賞徒勞牛足後果流  
可及於嶺表舊賜珍玩悉皆進納君子謂季玄有先見之明

同昌公主外傳終





# 古今說海

## 睦仁舊傳

說淵四十二別傳四十三

唐睦仁舊趙郡邯鄲人也少事經學不信鬼神常欲試其有無就見鬼人學之十餘年不能得見後徙家向縣於路見一人如大官衣冠甚偉乘好馬從五十餘騎視仁舊而不言後數見之終十年凡數十相見後忽駐馬呼仁舊曰比頻見君情相眷慕願與君交游仁舊卽拜之間公何人邪答曰吾是鬼耳姓成名景本弘農人西晉時爲別駕今任臨湖國長史仁舊問其國何在王何姓名答曰黃河已北總謂臨湖國都在樓煩西北沙磧是也其王卽故趙武靈王今統此國總受太山控攝每月各使上相朝於太山是以數來過此與君相遇也吾乃能有相益令君預知禍難而先避之可免橫苦唯死生之命與大禍福之報不能移動耳仁舊從之景因命其從騎常掌事以贈之遺隨舊行有事令先報之卽爾所不知當來告我於是便別掌事恒隨逐如侍從者每有所問無不先知時大業初江陵岑之象爲邯鄲令子文本本年未弱冠之象請仁舊於家教文本仁舊以此事告文本仍謂曰成長史語我有一事羞君

不得道既與君交亦不能不告鬼神道亦有食然不能得飽常苦饑若得人食便得一年飽衆鬼多偷竊人食我既貴重不能偷之從君請一食仁舊既告文本文本卽爲具饌備設珍羞仁舊曰鬼不欲入人屋可於外水邊張幕設席陳酒食於上文本如其言至時仁舊見景與兩客來坐從百餘騎既坐文本向席再拜謝以食之不精亦傳景意辭謝初文本將設食仁舊請有金帛以贈之文本問是何等物仁舊云鬼所用物皆與人異唯黃金及絹爲得通用然亦不如假者以黃色塗大錫作金以紙爲絹帛最爲貴上文本如言作之及景食畢令其從騎更代坐食文本以所作金錢絹贈之景深喜謝曰因睦生煩郎君供給郎君頗欲知壽命乎文本辭云不願知也景笑而去數年後仁舊遇病不甚困篤而不起月餘間常掌事掌事不知便問長史長史報云月內不知後月因朝太山爲問消息相報至後月長史來報云是君鄉人趙某爲太山主簿主簿一員闕薦君爲此官故爲文案經紀召君耳案成者當死仁舊問計將安出景云君壽應年六十餘今始四十但以趙主簿橫徵召耳當爲請之乃曰趙主簿相問睦兄昔與同學恩情深至今幸得爲太山主簿適遇一員官闕明

府令擇人吾已啟公公許相用兄既不得長生命當有死死遇濟會未必當官何惜一二十年苟生邪今文書已出不可復止願決作來意無所疑也仁菑憂懼病愈篤景謂仁菑曰趙主簿必欲致官君可自往太山於州君陳訴則可以免仁菑問何由見府君景曰往太山廟東度一小嶺平地是其都所君往自當見之仁菑以告文本本爲具行裝數日景又告仁菑曰文書欲成君訴懼不可免急作一佛像彼文書自消仁菑告文本以三千錢爲畫一座像於寺西壁訖而景來告曰免矣仁菑情不信佛意尙疑之因問景云佛法說有三世因果此爲虛實答曰皆實仁菑曰卽如是人死當分入六道那得盡爲鬼而趙武靈王及君今尙爲鬼邪景曰君縣內幾戶仁菑曰萬餘戶又曰獄囚幾人仁菑曰常二十人已下又曰萬戶之內有五品官幾人仁菑曰無又曰九品已上官幾人仁菑曰數十人景曰六道之義一如此耳其得天道萬無一人如君縣內無一五品官得人道者萬有數十如君獄內九品數十人入地獄者萬亦數十如君獄內囚惟鬼及畜生最爲多也如君縣內課役戶就此道中又有等級因指其從者曰彼人大不如我其不及彼者尤多仁菑曰鬼有死乎曰然

仁菑曰死入何道答曰不知如人知生而不知死仁菑曰道家章醮爲有益否景曰道者被天帝總統六道是爲天曹閻羅王者如人間天子太山府君如尙書令錄五道神如諸尙書若我輩國如太州郡每人間事道士上章請福如求神之恩天曹受之下閻羅王云以某月日得某申訴云宜盡理勿令枉濫閻羅敬受而奉行之如人奉詔也無理不可求免有枉必當得申何爲無益也仁菑又問佛法家修福何如景曰佛是大聖無文書行下其修福者天神敬奉多得寬宥若福厚者雖有惡道文簿不得追攝此非吾所識亦莫知其所以然言畢卽去仁菑一二日能起便愈文本父卒還鄉里仁菑寄書曰鬼神定有貪諂往日欲郎君飲食乃爾殷勤此知無復利相見殊落漠然常掌事猶見隨本縣爲賊所陷死亡略盡僕爲掌事所導如常賊不見竟以獲全貞觀十六年九月八日文官賜射於玄武門文本時爲中書侍郎自語人云爾

睦仁菑傳終

# 古今說海

## 韋鮑二生傳

### 說淵四十四

別傳四十四

酒徒鮑生家富畜妓開成初行歷陽道中止定山寺遇外弟韋生下第東歸同憩水閣鮑置酒酒酣韋謂鮑曰樂妓數輩焉在得不有攜挈者乎鮑生曰幸各無恙然滯維揚日連斃數駟後乘既闕不果悉從唯與夢蘭小倩俱耳亦可以佐觀矣頃之二雙環抱胡琴方響而至遂坐鮑生之左縱絲擊金響亮溪谷酒闌鮑謂韋曰出城得良馬乎對曰予春初塞遊自鄜坊歷烏延抵平夏止靈鹽而回部落駟駿獲數匹龍形鳳頸鹿脰鳧膺跟大足輕脊平筋密者皆有之鮑撫掌大悅乃停盃命燭閱馬數匹於軒檻前與向來誇誕十未盡其八九韋戲鮑曰能以人換任選殊尤鮑欲馬之意頗切密遣四絃更衣盛裝頃之而至乃命奉酒獻韋生歌一曲以送之云白露濕庭砌皓月臨前軒此時去畱恨含思獨無言又歌送鮑生酒云風颭荷珠難暫圓多生信有短因緣西樓今夜三更月還照離人泣斷絃韋乃召御者牽紫叱撥以酬之鮑意未滿往復之說素然無章有紫衣冠者二人導從甚衆自水閣之西升階而來

鮑章以寺當星使交馳之路疑大僚夜至方恐悚乃入室闔戶以窺之而盃盤狼籍不暇收拾紫衣卽席相顧笑曰此卽向來捐妾換馬之筵乎因命酒對飲一人鬚髯甚長質貌甚偉持盃望月沈吟久之曰足下盛賦云斜漢左界北陸南躔白露暖空素月流天可謂光前絕後矣對曰殊不見賞風霽地表雲斂天末洞庭始波木葉微脫長鬚云數年來在長安蒙樂遊王引至南宮入都堂與劉公幹鮑明遠看試秀才予竊入司文之室於燭下窺能者制作見屬對頗切而賦有蜂腰鶴膝之病詩有重頭重尾之犯若如足下洞庭木葉之對爲紕繆矣小子拙賦云紫臺稍遠燕山無極涼風忽起白日西匿則稍起之聲俱遭黜退矣不亦異哉顧謂前長鬚曰吾聞古之諸侯貢士於天子尊賢勸善者也故一適謂之好德再適謂之尊賢三適謂之有功乃如九錫不貢士一黜爵再黜地三黜爵地夫古求士也如此猶恐搜山之不高索林之不遠尙有遺漏者乃每歲季春開府庫出幣帛周天下而禮聘之當時儒墨之徒豈盡出矣智謀一士豈盡舉矣山林川澤豈無遺矣日月照臨豈盡得其所矣天子求之旣如此諸侯貢之又如此聘禮復如此尙有棲棲於巖谷鬱鬱不得志者吾

聞今之求聘之禮闕矣貢舉之道墮矣賢不肖同途焉才不才汨汨焉隱巖穴者自童髮窮經至於白首焉懷方策者自壯歲力學訖於沒齒焉雖每歲鄉里薦之於州府州府貢之於有司有司考之詩賦蜂腰鶴膝謂不中度聲音清濁謂不協律雖周孔之賢聖斑馬之文章不由此製作靡得而達矣然皇王帝霸之道興亡理亂之體其可聞乎今足下何乃贊揚今之小巧而墮古之大體况予乃愬皓月長歌之手豈能歡於雕文刻句者哉今珠露既清桂月如晝吟詠時發盃觴間行能援管聯句賦今之體調一章以樂長夜否曰何以爲題長鬚云便以妾換馬爲題仍以捨彼傾城求其駿足爲韻命左右折庭前芭蕉一片啟書囊抽毫以操之各占一韻長鬚者唱云彼美人兮如瓊之英此良馬兮負駿之名將有求於逐日故何惜乎傾城香暖深閨未厭天桃之色風清廣陌曾憐噴玉之聲人以矜其容馬乃稱其德既各從其所好諒何求而不克長跪而別姿容休耀其金鈿右牽而來光彩頓生於玉勒紫衣曰步及庭砌効當軒墀望新恩懼非吾偶也戀舊主疑借人乘之香散綠驄意已忘於綠鬢汗流紅頰愛無異於凝脂長鬚曰是知事有興廢用有取舍彼以絕代之容爲



鮮矣此以軼羣之足爲貴哉買笑之思既盡有類夢焉據鞍之力尙存猶希進也賦四韻訖芭蕉盡韋生發篋取紅牋跪獻於廡下二公大驚曰幽顯路殊何見逼之若是然吾子非後有爵祿不可與鄙夫相遇謂生曰異日主文柄較量俊秀輕重無以小巧爲意也言訖行十餘步而失

# 古今說海

## 張令傳

### 說淵四十五

別傳四十五

浮梁張令家業蔓延江淮間累金積粟不可勝計秩滿如京師常先一程致頓陸海珍美畢具至華陰僕夫施幄幕陳罇罍庖人炙羊方熟有黃衫者據盤而坐僕夫連叱神色不撓店嫗曰今五方弋羅之輩橫關內此其流也不可與競僕夫方欲求其帥以責之而張令至具以黃衫者告令曰勿叱召黃衣者問曰來自何方黃衫但唯唯耳促煖酒酒至令以大鐘飲之雖不謝似有愧色飲訖顧炙羊著目不移令自割以勸之一足盡未有飽色令又以奩中饌十四五啖之凡飲二斗餘酒酣謂令曰四十年前曾於東店得一醉飽以至今日令甚訝之乃勤懇問姓氏對曰某非人也蓋直旬送關中死籍之吏耳令驚問其由曰太山召人魂以將死之籍付諸嶽俾其捕送耳令曰可得一觀乎曰略窺亦無患於是解革囊出一軸其首云太山主者牒金天府其第二行云貪財好殺見利忘義人前浮梁縣令張某卽張君也令見名泣告使者曰修短有命誰敢惜死但某方強仕不爲死備家業浩大未有所付何術得延

其期某囊橐中計所直不下數十萬盡可以獻於執事使者曰一飯之恩誠宜報答百萬之賜某何用焉今有仙官劉綱者謫在蓮花峯足下宜匍匐徑往哀訴奏章舍此則無計矣吾昨聞金天王與南嶽博戲不勝輸二十萬甚被逼迫足下可詣嶽廟厚數以許之必能施力於仙官縱力不及亦得路於蓮花峯下不爾荆榛蒙密川谷阻絕無能往者令於是齎牲牢馳謁嶽廟以千萬許之然後直詣蓮花峯得幽徑凡數十里至峯下轉東南有一茅堂見道士隱几而坐問令曰腐骨穢肉神亡魂耗者安得來此令曰鐘鳴漏盡亡在頃刻竊聞仙官能復精魂於朽骨致肌肉於枯骸既有好生之心豈惜奏章之力道士曰吾頃爲隋朝權臣一奏遂謫居此峯爾何德於予欲陷吾爲寒山之叟令哀祈愈切仙官神色甚怒俄有使者齎一函而至則金天王書札也仙官覽書笑曰關節旣到難爲不應召使者反報曰不知又爲上帝譴責否乃啓玉函書一通焚香再拜以遣之凡食頃天符乃降其上署徹字仙官復焚香再拜以啟之云張某棄背祖宗竊假名位不顧法禮苟偷官榮而又鄙僻多藏詭詐無實百里之任已是叨居千乘之富全因苟得今案罪已實待戮餘魂何爲來章求

延厥命但以扶危拯溺者大道所尚紓刑宥過者玄門是宗狗爾一眦全我弘化希其悛惡庶乃自新貪生者量延五年奏章者不能無罪仙官覽訖謂令曰大凡世人之壽悉可數百歲而以喜怒哀樂汨沒心源愛惡嗜慾戕伐性根而又揚己之能掩彼之長顛倒方寸頃刻萬變神倦思怠難全天和如彼淡泉汨於五味欲其不壞其可得乎勉遵歸途無墜吾教令拜辭舉首已失所在復尋舊路稍覺平易行十餘里黃衫吏迎前而賀令曰將欲奉報願知姓字吏曰吾姓鍾生爲宣城縣脚力亡於華陰遂爲幽冥所錄遞符之役勞苦如舊令曰何以免執事之困曰但酬金天王願日請置予爲闈人則吾飽神盤惠矣文符已遣半日難更淹畱便與執事別入廟南柘林三五步而沒是夕張令駐車華陰決東歸計酬天王願所費數踰二萬乃語其僕曰二萬可以贍吾十舍之資糧矣安可受祉於上帝而私謁於土偶人乎明且遂東至偃師止於縣館見黃衫舊吏齋牒排闥而進叱張令曰何虛妄之若是今禍至矣由爾償三峯之願不果決俾吾答一飯之恩無始終悒悒之懷如痛毒螫言訖失所在頃刻張令有疾畱書遺妻子未訖而終

張令傳終

# 古今說海

## 李清傳

說淵四十六

別傳四十六

李清北海人也代傳染業清少學道多延齊魯之術士道流必誠敬接奉之終無所遇而勤求之意彌切家富於財素爲青州之豪毗子孫及內外嫗族近數百家皆能游手射利於益都每清之生日則爭先餽遺凡積百餘萬清性仁儉來則不拒納亦不散如此相因填累藏舍年六十九生日前一旬忽召嫗族大陳酒食已而謂曰吾賴爾輩勤力無過各能生活以是吾獲優贍然吾布衣蔬食逾三十年矣甯復有意於華侈哉爾輩以吾老長行每遺吾生日衣裝服玩其侈亦至矣然吾自久所得緘之一室曾未閱視徒損爾之給用資吾之糞土竟何爲哉幸天未錄吾魂氣行將又及生辰吾固知爾輩果營餽續之財吾所以先期而會蓋止爾之常態耳子孫皆曰續壽自遠有之非此將何以展卑下孝敬之心願無止絕婚嫗故舊不安也清曰苟爾輩之志不可奪則從容所欲而致之可乎皆曰願聞尊旨清曰各能遺吾洪纖靡糜百尺總而計之是吾獲數千百丈矣以此爲紹續吾壽豈不延長哉皆曰謹奉教

然尊旨的有所以卑小敢問清笑而謂曰終亦須令爾輩知之吾下界俗人妄亦求道精神心力夙夜勤勞於今六十載矣而曾無影響吾年老矣耄朽殆盡自期筋骸止可遷延三二年耳欲乘視聽步履之尙能將行早志爾輩幸無阻吾先是青州南十里有高山俯壓郡城峰頂中裂豁爲關崖州人家家坐對嵐岫歸雲過鳥歷歷盡見按圖經云雲門山俗亦謂之劈山而清蓄意多時及是謂媼族曰雲門山神仙之窟宅也吾將往焉吾生日坐大竹簣以輓轡自縋而用纖縻爲媒焉脫不可前吾當急引其媒爾則出吾於媒未振候及實而止肆吾志所如當復來歸子孫媼族泣而諫曰冥冥深遠不測紀極况山精木魅蛇虺怪物何類不儲忽以千金自絕而投豈久視永年之階乎清曰吾之志也汝輩必阻則吾私行矣是不獲竹簣洪縻之安也衆知不可回則共成其事及期而媼族鄉里凡千百人競齋酒饌遲明大會於山椒清乃揮手謝辭而入焉良久及地其中極暗仰視天纔如手掌捫四壁止容兩席許東南有穴可俯僂而入乃棄簣遊焉初甚狹細漸往則可伸腰如此約行三十里晃朗微明俄及洞口山川景象雲煙草樹宛非人世曠望久之惟東南十數里隱映若

有居人焉因徐步詣之至則陡絕一臺階級極峻而南行可以登陟遂虔誠而上頗懷恐懼及至先窺堂宇甚嚴中有道士四五人清於是叩門俄有青童應門問曰青州染工李清青童如詞以報清聞中堂曰李清伊來也乃令前進清惶怖趨拜當軒一人遙語曰未宜來卽遽至因令遍拜諸賢其時日已午忽有白髮翁自門而入禮謁啟曰蓬萊霞明觀丁尊師新到衆聖令邀諸眞登上清赴會於是列眞偕行謂清曰汝且居此臨出顧曰慎無開此扉清巡視院宇兼啟東西門情意飄飄然自惟永棲眞境因至堂北見北戶斜掩偶出顧望下爲青州宛然在掌離思歸心良久方爾悔恨欲返諸眞則已還矣其中相謂曰令其勿犯北門竟爾自惑信知仙界不可妄至也因與瓶中酒飲一甌其色濃白既而謂曰汝可且歸清則叩頭求哀又云無路却返衆謂清曰會當至此但時限未耳汝勿苦無途但閉目足至地則到鄉也清不得已流涕辭行或相謂曰遣其歸須令有以爲生清心恃豪富訝此語爲不知己一人顧清曰汝於堂內閣上取一軸書去清既得謂清曰脫無依賴可以此書自給清遂閉目遂覺身如飛鳥但聞風水之聲相激須臾履地開目卽青州之南門其時纔



申未城隍阡陌髣髴如舊至於屋室樹木人民服用俱已變改獨行盡日更無一人相識者卽詣故居朝來之大宅宏門改張新舊曾無倣像左側有業染者因投詣與之語其人稱姓李自云我本北海富家因指前後閭閻曰此皆我祖先之故業曾祖求道隋開皇四年生日自縊南山不知所終因是家道淪破清挹挹久之乃換姓氏寓遊城邑卽取所得書開之則療小兒諸疾方也其年青州小兒癘疫清之所醫無不立愈不旬月財產復振時高宗永徽元年天下富庶而北海往往有知清者因是齊魯人從而學道術者凡百千輩至五年清乃謝門徒云吾往泰山觀封禪自此莫知所往

李清傳終

# 古今說海

## 薛昭傳

說淵四十七別傳四十七

薛昭者唐元和末爲平陸尉以氣義自喜常慕郭代公李北海之爲心因夜直宿囚有爲母復仇殺人者與金而逸之故縣聞於廉使廉使奏之坐謫爲民於海康勅下之日不問家產但荷銀鑕而去有客田山叟者或云數百歲時來平生正與昭洽乃齎酒闌道而飲餞之謂昭曰君義夫也脫人之禍而自當之眞荆叢之儔也吾請從子昭不許固請乃許之至三鄉夜山叟脫衣易酒大醉其左右謂昭曰可遁矣與之攜手出東郊贈藥一粒曰非唯去疾兼能去食又約曰此去但遇道北有林藪繁翳處可且匿不獨逃難當獲美姝昭辭行遇蘭昌宮古木修竹四合其所昭踰垣而入追者但東西奔走莫能知蹤矣昭潛於古殿之西間及夜風清月皎見階間有三美女笑話而至揖讓升於花茵以犀杯酌酒而進之居其首女子醜之曰吉利吉利好人相逢惡人相避其次曰良宵宴會雖有好人豈易逢邪昭居窻隙間聞之又誌田生之言遂躍出口適聞夫人云好人豈易逢邪昭雖不才願備好人之數三女愕然

良久曰君是何人而匿於此昭具以實對乃設座於茵之南昭詢其姓字長曰雲容張氏次曰鳳臺蕭氏次曰蘭翹劉氏飲將酣蘭翹命骰子謂二女曰今夜嘉賓相逢須有匹偶請擲骰子遇采強者得薦枕席遍擲雲容采勝蘭翹遂命薛郎近雲容姊坐又持雙杯而獻曰眞所謂合卺矣昭拜謝之遂問夫人何許人何以至此答曰某乃開元中楊貴妃之侍兒也妃甚愛惜常令獨舞霓裳於繡嶺宮妃贈我詩曰羅袖動香香不已紅蕖裊裊秋煙裏輕雲嶺上乍搖風嫩柳池邊初拂水詩成皇帝吟諷久之亦有繼和但不記耳遂賜雙金扼臂因茲寵幸愈於羣輩此時多遇帝與申天師譚道余獨與貴妃得竊聽亦數侍天師茶藥頗獲天師憫之因閒處叩頭乞藥師云吾不惜但汝無分不久處世如何我曰朝聞道夕死可矣天師乃與絳雪丹一粒曰汝但服之雖死不壞但能大其棺廣其穴含以眞玉疎而有風使魂不蕩空魄不沈寂有物拘制陶出陰陽後百年得遇生人交精之氣或再生便爲地仙耳我沒蘭昌之時同輩具以白貴妃憐之命中貴人陳玄造受其事送終之器皆荷如約今已百年矣仙師之兆莫非今宵良會乎此乃宿分非偶然耳昭因詰申天師之貌乃田

山叟之魁梧也昭大驚曰山叟卽天師明矣不然何以委曲使余符曩日之事哉又問蘭鳳二子容曰亦當時宮人有容者爲九仙媛所忌毒而死之藏吾穴之側與之交遊非一朝一夕耳鳳臺請擊席而歌送昭容酒歌曰臉花不綻幾含幽今夕陽春獨換秋我守孤燈無白日寒雲隴上更添愁蘭翹和曰幽谷啼鶯整羽翰犀沈玉冷自長歎月華不忍扃泉戶露滴松枝一夜寒雲容和曰韶光不鑿分成塵曾餌金丹忽有神不意薛生攜舊律獨開幽谷一枝春昭亦和曰悞入宮牆漏網人月華清洗玉階塵自疑飛到蓬萊頂瓊艷三枝半夜春詩畢旋聞鷄鳴三人曰可歸室矣昭持其衣超然而去初覺門戶至微及經闕亦無所妨蘭鳳亦告辭而他往矣但燈燭熒熒侍俾凝立帳幄綺繡如貴戚家焉遂同寢處昭甚慰喜如此覺數夕但不知昏且容曰吾體已蘇矣但衣服破故更得新衣則可起矣今有金扼臂君可持往近縣易衣服昭懼不敢去曰恐爲州縣所執容曰無憚但將我白絹去有急卽蒙首人無能見矣昭然之遂出三鄉貨之市其衣服夜至穴側容已迎門而笑引入曰但啟櫬當自起矣昭如其言果見容體已生及回顧看帷帳但一大穴多盟器服玩金玉惟取

寶器而出遂與容同歸金陵幽棲至今見在容鬢不衰豈非俱餌天師之靈藥乎申師名元也

薛昭傳終

# 古今說海

王賈傳

說淵四十八 別傳四十八

婺州參軍王賈本太原人移家覃懷而先人之壟在於臨汝賈少而聰穎未嘗有過沈靜少言年十四忽謂諸兄曰不出三日家中當恐且有喪居二日宅中火延燒堂室祖母年衰震驚自投於牀而卒兄以賈言聞諸父諸父訊賈賈曰卜筮知之後又白諸父曰太行南泌河灣澳內有兩龍居之欲識真龍請同觀之諸父怒曰小子好詭言駭物當笞之賈跪曰實有故請觀之諸父因與同行賈請具雨衣於是至泌河淵深處賈入水以鞭畫之水爲之分下有大石二龍盤繞之一白一黑各長數丈見人冲天諸父大驚良久瞻視賈曰既見矣將復之因以鞭揮之水合如舊則雲霧晝昏雷電且至賈曰諸父駛去因馳未里餘飛雨大注方知非常人也賈年十七詣京舉孝廉果擢第乃娶清河崔氏女選授婺州參軍還過東都賈母之表妹死已經年常於靈帳發言處置家事兒女童妾不敢爲非每索飲食衣服有不應求卽加笞罵親戚咸怪之賈曰此必妖異因造姨宅唁姨諸子先是姨謂諸子曰明日王冢外

甥來必莫令進此小子大罪過人賈既至門不得進賈令召老蒼頭謂曰宅內言者非汝主母乃妖魅耳汝但私語汝郎君令我入當爲除去之家人素病之乃潛言於諸郎郎悟因哭令賈行弔已因向靈言曰聞姨亡來大有神異言語如舊今故來謁姨何不與賈言也不應賈又邀之曰今故來謁姨若不言終不去矣當止於此魅被其動請帳中言曰甥比佳乎何期別後生死遂隔汝不相忘猶能相訪愧不可言因涕泣言語泣聲皆姨平生聲也諸子聞之號泣令具饌坐賈於前命酒相對殷勤不已醉後賈因請曰姨既神異何不令賈一見姨曰幽明道殊何要相見賈曰姨不能全出請露面不然呈一手一足令賈見之如不相示亦終不去魅既被邀苦至因見左手於几宛然又姨之手也諸子又號泣賈因前執其手姨驚命諸子曰外甥無禮何不舉手諸子未進賈遂引其手撲之於地尙猶哀叫撲之數四卽死乃老狐也真形既見體裸無毛命火焚之靈語遂絕賈至婺州以事到東陽令有女病魅數年醫不能愈令邀賈到宅置名饌而不敢有言賈知之謂令曰聞令有女病魅當爲去之因爲桃符令置所臥牀前女見符泣而罵須臾眠熟有大狸腰斬死于牀下疾乃

止時杜暹爲婺州參軍與賈同列相得甚歡與暹同部領使於洛陽過錢塘江登羅刹山觀浙江潮謂暹曰大禹眞聖者當治水時所有金櫃玉符以鎮川瀆此杭州城不鎮壓尋常陷矣暹曰何以知之賈曰此石下是相與觀焉因令暹閉目執其手令暹跳下暹忽閉目已至水底其空處如堂有大石櫃高丈餘鏤之賈手開其鏤遂去其蓋引暹手登之因同入櫃中又有金櫃可高三尺金鏤之賈曰玉符在中然世人不合見暹觀之既已則鏤石櫃又接其手令騰出暹纔跳躍則至岸矣既與暹交熟乃告暹曰君有宰相祿當自保愛因示其拜官歷任及於年壽周細語之暹後遷拜一如其說既而至吳郡停船而女子天生五年矣母撫之哀慟而賈不哭暹素重賈各見妻子如一家於是對其妻謂暹曰吾第三天人也有罪謫爲世人二十五年今已滿矣後日當行此女亦非吾子也所以早夭妻崔氏亦非吾妻卽吉州別駕李乙妻也緣時歲未到乙未合娶以吾旣爲世人亦合有室故司命權以妻吾今期已盡妻卽當適李氏李氏三品祿致仕生五子大數已定不知何爲妄哭妻久知其夫靈異因輟哭請曰吾方年盛君何忍見舍且暑月在途零丁如此請送至洛陽得免棲



遲行路之人猶合矜愍况室家之好而忍遺棄邪賈笑而不答因令造棺器納亡女於中置之船下又囑遲以身後事曰吾卒後爲素棺漆其縫將至先塋與女子皆附之於墓是後卽發至宋州崔氏伯任宋州別駕當留其姪聽之至冬初李乙必充計入京與崔氏伯相見卽伯之故人也因求婚崔別駕以姪妻之事已定矣遲然之其妻日夜涕泣請其少留終不答至日沐浴衣新衣暮時召遲相對言談頃而臥遂卒遲哭之慟爲制朋友之服如其言殮之行及宋州崔別駕果留其姪遲至則如臨汝厚葬及其子其冬李乙至宋州求壻其妻崔別駕以妻之遲後作相歷中外皆如其語

# 古今說海

## 烏將軍記

### 說淵四十九

別傳四十九

代國公郭元振開元中下第自晉之汾夜行陰晦失道久而絕遠有燈火之光以爲人居也徑往投之八九里有宅門宇甚峻旣入門廊下及堂上燈燭熒煌牢饌羅列若嫁女之家而悄無人公繫馬西廊前厯階而升徘徊堂上不知其何處也俄聞堂中東閣有女子哭聲嗚咽不已公問曰堂中泣者人邪鬼邪何陳設如此無人而獨泣曰妾此鄉之祠有烏將軍者能禍福人每歲求偶於鄉人鄉人必擇處女之美者而嫁焉妾雖陋拙父利鄉人之五百緡潛以應選今夕鄉人之女並爲遊宴者到是醉妾此室共讎而去以適于將軍者也今父母棄之就死而已惴惴哀懼君誠人邪能相救免畢身爲除掃之婦以奉指使公大憤曰其來當何時曰二更公曰吾忝爲大丈夫也必力救之如不得當殺身以殉汝終不使汝枉死於淫鬼之手也女泣少止於是坐於西階上移其馬於堂北令一僕侍立於前若爲僮而待之未幾火光照耀車馬駢闐二紫衣吏入而復走出曰相公在此逡巡二黃衣吏入而出亦曰相公

在此公私心獨喜吾當爲宰相必勝此鬼矣旣而將軍漸下導吏復告之將軍曰入有戈劍弓矢翼引以入卽東階下公使僕前曰郭秀才見遂行揖將軍曰秀才安得到此曰聞將軍今夕嘉禮願爲小相耳將軍者喜而延坐與對食言笑極歡公囊中有利刀思取刺之乃問曰將軍曾食鹿腊乎曰此地難遇公曰某有少許珍者得自御廚願削以獻將軍者大悅公乃起取鹿腊并小刀因削之置一小器令自取將軍喜引手取之不疑其他公伺其無機乃投其脯捉其腕而斷之將軍失聲而走導從之吏一時驚散公執其手脫衣纏之令僕夫出望之寂無所見乃啓門謂泣者曰將軍之腕已在此矣尋其血蹤死亦不久汝旣獲免可出就食泣者乃出年可十七八而甚佳麗拜於公前曰誓爲僕妾公勉諭焉天方曙開視其手則猪蹄也俄聞哭泣之聲漸近乃女之父母兄弟及鄉中耆老相與舁櫬而來將收其屍以備殮殮見公及女乃生人也咸驚以問之公具告焉鄉老共怒殘其神曰烏將軍此鄉鎮神鄉人奉之久矣歲配以女才無他虞此禮少遲卽風雨雷雹爲虐奈何失路之客而傷我明神致暴於人此鄉何負當殺公以祭烏將軍不爾亦縛送本縣揮少年將令執公

公諭之曰爾徒老於年未老於事我天下之達理者爾衆聽吾言夫神受天之命而爲鎮也不若諸侯受命於天子而疆理天下乎曰然公曰使諸侯漁色於國中天子不怒乎殘虐於人天子不伐乎誠使爾呼將軍者眞神明也神固無豬蹄天豈使淫妖之獸乎且淫妖之獸天地之罪畜也吾執正以誅之豈不可乎爾曹無正人使爾少女年年橫死於妖畜積罪動天安知天不使吾雪焉從吾言當爲爾除之永無聘娶之患如何鄉人悟而喜曰願從命公乃令數百人執弓矢刀鎗鋏鑊之屬環而自隨尋血而行纔二十里血入大塚穴中因圍而斷之應手漸大如甕口公令束薪燃火投入照之其中若大室見一大猪無前左蹄血臥其地突煙走出斃於圍中鄉人翻共相慶會餞以酬公公不受曰吾爲人除害非鬻獵者得免之女辭其父母親族曰多幸爲人託質血屬閨闈未出固無可殺之罪今者貪錢五十萬以嫁妖獸忍鏃而去豈人所宜若非郭公之仁勇寧有今日是妾死於父母而生於郭公也請從郭公不復以舊鄉爲念矣泣拜而從公公多岐援喻止之不獲遂納爲側室生子數人公之貴也皆任大官之位事已前定雖生遠地而棄焉鬼神終不能害明矣

烏將軍記終

# 古今說海

寶玉傳

說淵五十 別傳五十

進士王勝蓋夷元和中求薦於同州時賓館填溢假郡功曹王翥第以俟試既而他室皆有客惟正堂以小繩繫門自牖而窺其獨床上有褐衾床北有破籠此外更無有問其隣曰處士寶三郎玉居也二客以西廂爲窄思與同居甚喜其無姬僕也及暮寶處士者一驢一僕乘醉而來夷勝前謁且曰勝求解於郡以賓館喧故寓於此所得西廊亦甚窄君子旣無姬僕又是方外之人願略同此堂以俟郡試玉固辭接對之色甚傲夜深將寢忽聞異香驚起尋之則見堂中垂簾帷喧然笑語於是夷勝突然入其堂中屏帷四合奇香撲人雕盤珍膳不可名狀有一女年可十八九嬌麗無比與寶對食侍婢十餘人亦皆端妙銀爐煑茗方熟坐者起入西廂帷中侍婢悉入曰是何兒耶突衝人家寶面色如土端坐不語夷勝無以致辭啜茗而出旣下階聞閉戶之聲曰風狂兒耶因何共止古人所以卜鄰者豈虛語哉寶辭以非已所居難拒異客必慮輕侮豈無他宅因復歡笑及明往覘之盡復其舊寶獨偃於褐衾中

拭目方起夷勝詰之不對夷勝曰君晝爲布衣夜會公族苟非妖幻何以致麗人不言其實當卽告郡竇曰此固秘事言亦無妨比者玉薄遊太原晚發冷泉將宿於孝義縣陰晦失道夜投人莊問其主其僕曰汾州崔司馬莊也令人告焉出曰延入崔司馬年可五十餘衣緋儀貌可愛問竇之先及伯叔昆弟詰其中外親族乃玉舊親知其爲表丈也自幼亦嘗聞此丈人但不知官位慰問殷勤情意甚優重因令報其妻曰竇秀才乃是右衛將軍七兄之子是吾之重表姪夫人亦是丈母可見之從宦異方親戚雜阻不因行李豈得相逢請卽見有頃一青衣曰屈三郎入其中堂陳設之盛若王侯之居盤饌珍奇味窮海陸旣食丈人曰君今此遊將何所求曰求舉資耳曰家在何郡曰海內無家丈人曰君生涯如此身事落然蓬遊無抵徒勞往復丈人有女年近長成今便令奉事衣食之給不求於人可乎玉起拜謝夫人喜曰今夕甚佳又有牢饌親戚中配屬何必廣召賓客吉禮旣具便取今夕謝訖復坐又進食食畢揖玉憩於西廳具沐浴訖授衣巾引相者三人來皆聰明之士一姓王稱郡法曹一姓裴稱戶曹一姓韋稱郡督郵相揖而坐俄而禮輿香車皆具花燭前引自西

廳至中門展親御之禮因又遶莊一周自南門入及中堂堂中帷帳已滿成禮訖初三更妻告玉曰此非人間乃神道也所言汾州陰道汾州非人間也相者數子無非冥官妾與君宿緣合爲夫婦故得相遇人神路殊不可久住君宜卽去玉曰人神既殊安得配屬已爲夫妻便合相從何爲一夕而別也妻曰妾身奉君固無遠近但君生人不合久居於此君速命駕常令君篋中有絹百疋用盡復滿所到必求靜室獨居少以存想隨念卽至十年之外可以同行今且晝別宵會爾玉乃入辭崔曰明晦雖殊人神無二小女子得奉巾櫛蓋是宿緣勿謂異類遂猜薄之亦不可言於人公法訊問言亦無妨言訖得絹百疋而別自夜獨宿思之則來供帳饌具悉其攜也若此者五年矣夷勝開其篋果有絹百疋因各贈三十疋求其秘之言訖遁去不知所  
在焉

寶玉傳終





# 古今說海

## 柳參軍傳

說淵五十一 別傳五十一

華州柳參軍名族之子寡慾早孤無兄弟罷官於長安閒遊上巳日於曲江見一車子飾以金碧從一青衣殊亦俊雅已而翠簾徐褰見搵手如玉指畫青衣令摘芙蓉女容色絕代斜睨柳生良久生鞭馬從之即見車入永從里柳生知其大姓崔氏女亦有母青衣字輕紅柳生不甚貧多方賂輕紅竟不之受他日崔氏女病其舅執金吾王因候其妹且告曰請爲子納焉崔氏不樂其母不敢違兄之命女曰願得嫁前時柳生足矣必不允以某與外兄終恐不生全其母念女深乃命輕紅於薦福寺僧道省院達意柳生爲輕紅所誘又悅輕紅輕紅大怒曰君性正麤奈何小娘子如此待於君某一微賤便忘前好欲保歲寒其可得乎某且以足下事白小娘子柳生再拜謝不敏始曰夫人惜小娘子情切今小娘子不樂適王家夫人是以偷成婚約君可三兩日就禮事柳生極喜備數百十財禮期日結婚後五日柳挈妻與輕紅於金城里居及旬月金吾到永從其母王氏泣云吾夫亡子女孤露被姪不待禮會強竊

女去矣兄豈無教訓之道金吾大怒歸笞其子數十密令捕訪彌年無獲無何王氏殂柳生挈妻與輕紅自金城里赴喪金吾之子既見遂告父父擒柳生生云某於外姑王氏處納采娶妻非越禮私誘也家人大小皆熟知之王氏既歿無所明遂訟於官公斷王家先下財禮合歸於王金吾子常悅表妹亦不怨前橫也經數年輕紅竟潔已處焉金吾又亡移其宅於崇義里崔氏不樂事外兄乃使輕紅訪柳生所在時柳生尙居金城里崔氏又使輕紅與柳生爲期兼賚看圃豎令積糞堆與宅垣齊崔氏女遂與輕紅躡之同詣柳生柳生驚喜又不出城只遷羣賢里後本夫終尋崔氏女知羣賢里住復興訟奪之王生情深崔氏萬途求免託以體孕又不責而納焉柳生長流江陵二年崔氏與輕紅相繼殂王生送喪哀慟之禮至矣輕紅亦葬於崔氏墳側柳生江陵閒居春二月繁花滿庭追念崔氏凝想形影且不知存亡忽聞叩門甚急俄見輕紅抱粧奩而進乃曰小娘子且至聞似車馬之聲比崔氏入門更無他見柳生與崔氏叙契闊悲歡之甚問其由則曰某已與王生訣自此可以同穴矣人生意專必果夙願因言曰某少習樂箜篌頗有功柳生卽時置箜篌調弄絕妙二年

閒可謂盡平生矣無何王生舊使蒼頭過柳生門忽見輕紅驚不知其所以又疑人有相似者未敢遽言問閭里又流人柳參軍彌怪更伺之輕紅知是王生家人亦具言於柳生匿之蒼頭却還城具言於王生生聞之命駕千里而來既至柳生門於隙窺之正見柳生坦腹於臨軒榻上崔氏女新粧輕紅捧鏡於側崔氏勻鉛黃未竟王生門外極叫輕紅鏡墜地有聲如磬崔氏與王生無憾遂入柳生驚亦待如賓禮俄又失崔氏所在柳生與王氏言事二人相看不喻大異之相與造長安發崔氏所葬驗之卽江陵所施鉛黃如新衣服飢肉且無損敗輕紅亦然柳與王相誓却葬之二人入終南訪道遂不返

柳參軍傳終



# 古今說海

## 人虎傳

說淵五十二 別傳五十二

隴西李微皇族子家於虢略微少博學善屬文弱冠從州府貢焉時號名士天寶十五載春於尚書右丞楊□下登進士第後數年調選補尉江南微性疎逸恃才倨傲不能屈跡卑僚嘗鬱鬱不樂每同舍會既酣顧謂其羣官曰生乃與君等爲伍邪其僚友咸側目之及謝秩則退歸閒適不與人通者近歲餘後迫以食且缺乃東遊吳楚間期斂於郡國長吏楚人聞其聲固久矣及至皆開館以俟之留宴遊極歡將去悉厚賄以實其囊橐微在吳楚且周歲所獲饋遺甚多西歸虢略未至舍於汝墳逆旅中忽被疾發狂鞭捶僕者不勝其苦如是旬餘疾益甚無何夜狂走莫知其適家僮跡其去而伺之盡一月而微竟不回於是僕者驅其乘馬挈其囊橐而遠遁去至明年陳郡李儼以監察御史奉詔使嶺南乘傳至商於界晨將去其驛吏白曰道有虎暴而食人故途於此者非晝莫敢進今尙早願且駐車固不可前儼怒曰我天子使後騎極多山澤之獸能爲害邪遂命駕而行去未盡一里果有虎自草中突出

儼驚甚俄而虎匿身草中人聲而言曰異乎哉幾傷我故人也儼聆其音似李微者儼昔與微同登進士第分極深別有年矣忽聞其語既驚且異而莫測焉遂問曰子爲誰豈非故人隴西子乎虎呼吟數聲若嗟泣之狀已而謂儼曰我李微也儼乃下馬曰君何由至此且儼始與君同場屋十餘年情好歡甚愈於他友不意吾先登仕路君亦繼捷科選睽間言笑歷時頗久傾風結想如渴待飲幸因出使得此遇君而乃自匿草中豈故人疇昔之意也虎白吾已爲異類使君見吾形則且畏怖而惡之矣何暇疇昔之念邪雖然君無遽去得少盡款曲乃我之幸也儼曰我素以兄事故人願展拜禮乃再拜虎曰我自與足下別音容曠阻且久矣僕夫得無恙乎宦途不致淹留乎今又何適向者見君有二吏驅而前驛隸挈印囊以導庸非爲御史而出飲乎儼曰近者幸得備御史之列今奉使嶺南虎曰君子以文學立身位登朝序可謂盛矣况憲臺清要分糾百揆聖明慎擇尤異於人心喜故人居此地甚可賀儼曰往者吾與執事同年成名交契深密異於常友自聲容間阻去日如流想望風儀心目俱斷不意今日獲君念舊之言雖然執事何爲不見我而自匿於草木中故人之

分豈當如是邪虎曰我今不爲人矣安得見君乎儼曰願詳其事虎曰我前身客吳楚去歲方還道次汝墳忽嬰疾發狂夜聞戶外有呼吾名者遂應聲而出走山谷間不覺以左右手攫地而步自是覺心愈狠力愈倍及視其肱髀則有班毛生焉心甚異之既而臨溪照影已成虎矣悲慟良久然尙不忍攫生物食也既久饑不可忍遂取山中鹿豕獐兔充食又久諸獸皆遠避無所得饑益甚一日有婦人從山下過時正餒迫徘徊數四不能自禁遂取而食殊覺甘美今其首飾猶在巖石之下也自是見冕而乘者徒而行者負而趨者翼而翔者毳而馳者力之所及悉擒而咀之立盡率以爲常非不念妻孥思朋友直以行負神祇一旦化爲異獸有覩於人故分不見矣嗟夫我與君同年登第交契素厚君今日執天憲耀親友而我匿身林藪永謝人世躍而呼天俛而泣地身毀不用是果命乎因呼吟咨嗟殆不自勝遂泣儼且問曰君今旣爲異類何尙能人言邪虎曰我今形變而心甚悟耳自居此地不知歲月多少但見草木榮枯耳近日絕無過客久饑難堪不幸搪突故人慙惶殊甚儼曰君久饑某有餘馬一疋留以爲贈如何虎曰食吾故人之俊乘何異傷吾故人乎願無及



此儼曰食籃中有羊肉數斤留以爲贈可乎曰吾方與故人道舊未暇食也君去則留之又曰我與君眞忘形之友也而我將有所託其可乎儼曰平昔故人安有不可哉恨未知何如事願盡教之虎曰君不許我我何敢言今既許我豈我望邪初我於逆旅中爲疾發狂旣入荒山而僕者驅我乘馬衣囊悉逃去吾妻孥尙在號怨豈知我化爲異類乎君自南回爲齋書訪吾妻子但云我已死無言今日事志之乃曰吾於人世且無資業有子尙稚固難自謀君位列周行素秉風義昔日之分豈他人能右哉必望念其孤弱時賑其乏無使殍死於道途亦恩之大者言已又悲泣儼亦泣曰儼與足下休戚同焉然則足下子亦儼子也當力副厚命又何虞其不至哉虎曰我有舊文數十篇未行於代雖有遺稿當盡散落君爲我傳錄誠不能列文人之戶闕然亦貴傳於子孫也儼卽呼僕命筆隨其口書近二十章文甚高理甚遠閱而歎者至於再三虎曰此吾平生之業也又安得寢而不傳歟旣又曰吾欲爲詩一篇蓋欲表吾外雖異而中無所異亦欲以道吾懷而攄吾憤也儼復命吏以筆授之詩曰偶因狂疾成殊類災患相仍不可逃今日爪牙誰敢敵當時聲跡共相高我爲異物

蓬茅下君已乘輶氣勢豪此夕溪山對明月不成長嘯但成嗥儼覽之驚曰君之才  
行我知之久矣而君至於此者君平生得無有自恨乎虎曰二儀造物固無親疎厚  
薄之間若其所遇之時所遭之數吾又不知也噫顏子之不幸再有斯疾尼父常深  
歎之矣若反求其所自恨則吾亦有之矣不知定因此乎吾遇故人則無所自匿也  
吾常記之於南陽郊外嘗私一孀婦其家竊知之常有害我心孀婦由是不得再合  
吾因乘風縱火一家數人盡焚殺之而去此爲恨爾虎曰使回日幸取道他郡無再  
遊此途吾今日尙悟一日都醉則君過此吾既不省將碎足下於齒牙間終成士林  
之笑焉此吾之切祝也君前去百餘步上小山下視盡見此將令君見我焉非欲矜  
勇令君見而不復再過此則知吾待故人之不薄也復曰君還都見吾友人妻子慎  
無言今日之事吾恐久留使旆稽滯王程願與子訣叙別甚久儼乃再拜上馬回視  
草茅中悲泣所不忍聞儼亦大慟行數里登嶺再視則虎自林中躍出跑躐巖谷皆  
震後回自南中乃取他道不復由此遣使持書及贈贈之禮訃於微子月餘微子自  
魏略入京詣儼求先人之柩儼不得已具疏其事遂以已俸均給微妻子免饑凍焉

儼後官至兵部侍郎

人虎傳終

# 古今說海

## 馬自然傳

說淵五十二別傳五十三

馬湘字自然鹽官人也世爲縣小吏而湘獨好經史攻文學嘗與道士天下遍遊後歸江南嘗醉於湖州墮雲溪經日坐水上而來衣履不濕言適爲項羽相召飲酒而返溪濱觀者如堵酒氣猶衝人狀若風狂路人多隨看之又時復以拳入鼻及出拳鼻如故又指溪水令逆流食頃指柳樹令隨溪水走來去指橋令斷復續後遊常州會宰相馬植出官量移常州刺史素聞湘名乃邀相見延禮甚異之植問曰幸與道兒同姓欲爲兄弟冀師道術可乎湘曰相公何望植曰扶風湘曰相公扶風馬湘則馬風牛但且相知無徵同姓亦言與植風馬牛不相及也然植留之郡齋益敬禮之或飲食次植請見小術乃於席上以羹器盛土種瓜須臾引蔓生花結實取食衆賓皆稱香美比常瓜更異又於遍身及襪上摸錢所出錢不知多少擲之皆青銅錢撮投井中呼之一一飛出人有收取頃之復失又植言此城中鼠極多湘乃書一符令人帖於南壁下以筋擊盤長嘯鼠成羣而來走就符下俯伏湘卽呼鼠有一大者趨

近堦前湘曰汝毛蟲微物天與粒食何得穿屋穴墻晝夜擾於相公且以慈憫爲心未能盡殺汝輩宜便相率離此大鼠乃回羣鼠前皆若叩搗謝罪遂作隊行莫知其數出城門去自後城內更絕鼠迹湘後南遊越州經洞巖禪院僧三百方齋而湘與婺州永康縣牧馬巖道士王知微及弟子王延叟同行僧見湘知微到踞而食略無揖者湘不食促知微延叟及食而去僧齋未畢及出門又促速行道諸暨縣南店中約去禪院七十餘里深夜聞尋道士聲主人遽應此有三人外面極喜請於主人願見道士但禮拜哀鳴云禪僧不識道者昨失奉迎致遺責怒三百僧到今下牀不得某二僧主事不坐所以得來固乞舍之湘惟睡而不對知微延叟但笑之僧愈哀乞湘乃曰此後無以輕慢爲意汝回入門坐僧當能下牀矣僧回果如其言湘翌日又南行時方春見道旁一家好菘菜求之不得仍聞惡語湘命延叟取紙筆知微遂言求菜見阻誠無訟理况在道門詎宜施之湘笑曰我非訟者也作小戲耳於是延叟授紙筆湘畫一白鷺以水噴之遂化成眞鷺飛入菜畦中啄菜其主逐起又飛下再三湘又畫一獮子亦以水噴化成走趁捉白鷺共踐其菜一時碎盡主人見道士戲

笑曾求菜致此慮復爲他術遂來哀乞湘曰非求菜也故相戲耳於是呼鷲及犬皆飛走投入湘懷中視菜如故悉無所損又南遊霍桐山入長溪縣界夜投旅舍宿舍少而行旅已多主人戲言無宿處道士能壁上睡卽相容時已逼日暮知微延叟切於止宿湘曰爾但於俗旅中睡而自躍身梁上以一脚掛梁側睡適主人夜起燭火照見始大驚異湘曰梁上猶能壁上何難俄而入壁久之不出主人祈謝移知微延叟入家內靜處湘乃出及旦主人留連忽失湘所在知微延叟前行數里尋求已在路旁自霍桐回永康縣東天寶觀駐泊觀有大枯松湘折之曰此松已後三十餘年卽化爲石自後松果化爲石忽大風雷震石倒山側作數截會陽發自廣州節度責婺州發性尙奇異乃徙兩截就郡齋兩截致之龍興寺各高六七尺徑三尺餘其石松皮鱗皴如故今猶存焉人或疾告者湘無藥但以竹拄杖打痛處腹內身上百病以竹杖指之口吹杖頭如雷鳴便愈有患腰脚駝曲杖杖而來者亦以竹拄杖打之令放杖應手便伸展時有以財帛與湘者固讓不受強與之復散與貧人所遊行之處或宮觀巖洞多題詩句其登杭州秦望山詩曰太一初分何處尋空留歷數變

人心九天日月移朝暮萬里山川自古今風動水光吞遠徼雨添嵐氣沒高林秦皇謾作驅山計滄海茫茫轉更深復歸故鄉省兄兄適出嫂姪喜叔歸湘曰我與兄共此宅歸來要明此地我惟愛東園耳嫂姪異之私計小叔久離家歸來兄猶未相面何便言分地骨肉之情必不忍如此駐留三日嫂姪與食皆不食但飲酒而已待兄不歸及夜遽卒明日兄歸問妻子其故具以實對兄感慟乃曰弟學道多年非歸要分宅是歸託化於我以絕思望耳乃棺斂其夕棺中忽然有聲一家驚異乃窆之東園時大中十年也明年東川奏歙州梓桐縣道士馬自然白日上昇湘嘗於東川謂人我仙官也敕江西道杭州覆之發塚視棺乃一竹杖而已

# 古今說海

寶應錄

說淵五十四 別傳五十四

開元中有李氏者嫁於賀若氏卒乃舍俗爲尼號曰真如家於鞏縣孝義橋其行高潔遠近宗推之天寶元年七月七日真如於精舍戶外盥濯之間忽有五色雲氣自東而來雲中引手不見其形徐以囊授真如曰寶之慎勿言也真如謹守不敢失墜天寶末祿山作亂中原鼎沸衣冠南走真如展轉流寓於楚州安宜縣肅宗元年建子月十八日夜真如所居忽見二人衣皂衣引真如東南而行行可五六十步值一城樓觀嚴飾兵衛鮮肅皂衣者指之曰化城也城有樓殿一人衣碧衣戴寶冠號爲天帝復有二十餘人衣冠亦如之呼爲諸天諸天坐命真如進旣而諸天相謂曰下界喪亂時久殺戮過多腥穢之氣達於諸天不知何以救之一天曰莫若以神寶壓之又一天曰當用第三寶又一天曰今沴氣方盛穢毒凝固第三寶不足以勝之須以第二寶授之則兵可息亂世可清也天帝曰然因出寶授真如曰汝往令刺史崔旆進達於天子復謂真如曰前所授汝小囊有寶五段人臣可得見之今者八寶唯



王者所宜見之汝慎勿易也乃具以寶名及所用之法授真如已而復令卓衣者送之翌日真如詣縣攝令王滔之以狀聞州州得滔之狀會刺史將行縣以狀示從事盧恒曰安宜縣有妖尼之事怪之甚也亟往訊之恒至縣召真如欲以王法加之真如曰上帝有命誰敢廢墮且寶非人力所致又何疑焉乃以囊中五寶示恒其一曰玄黃天符形如笏長可八寸餘闊三寸上圓下方近圓有孔黃玉也色比蒸粟澤若凝脂辟人間兵疫病氣其二曰玉雞毛文悉備白玉也王者以孝理天下則見其三曰穀璧白玉也徑五六寸其文粟粒自生無異雕鏤之狀王者得之則五穀豐稔其四曰王母玉環二枚亦白玉也徑六寸好倍於肉王者得之能令外國歸服其玉色光彩溢發特異於常盧恒曰玉信玉矣安知寶乎真如乃悉出寶盤向日照之其光皆射日仰望不知光之所極也恒與縣吏同視咸異之翌日旣至恒白於旣曰寶蓋天授非人事也旣覆驗無異歎駭久之卽具事申報節度使崔圓圓異之徵真如詣府欲歷視之真如曰不可圓固強之真如不得已又出入寶一曰如意寶珠其形正圓大如雞卵光色瑩徹置之堂中明如滿月其二曰紅韎鞞大如巨粟赤爛若朱櫻

視之可應手而碎觸之則堅重不可破也其三曰環玕珠其形如環四分缺一徑可五六寸其四玉印大如半手其文如鹿蹈之印中著物則形見其五曰皇后採桑鉤二杖長五六寸其細如筋屈其末似金又似銀又類熟銅其六曰雷公石二枚斧形長可四寸闊一寸無孔膩如青玉八寶置之日中則白氣連天措諸陰室則燭耀如月其所厭勝之法真如皆秘不可得而知也圓爲錄表奏之真如曰天命崔旉進達若何圓悟而止旉乃遣盧恒隨真如上獻時史朝義方圍宋州又南陷申州淮河道絕遂取江路而上抵商山入關以建巳月十三日達京時肅宗寢疾方甚視寶促召代宗謂曰汝自楚王爲皇太子今上天賜寶獲於楚州天許汝也宜保愛之代宗再拜受賜以得寶之故卽日改爲寶應元年上旣答天休乃升楚州爲上州縣爲望縣改縣名安宜爲寶應焉刺史上進寶官皆有超升號真如爲寶和寵錫有加自後兵革漸偃年穀豐登封域之內幾至小康寶應之符驗也真如所居之地得寶河湄高廠境物潤茂遺址後六合縣尉崔瑄所居兩堂之間相傳云西域胡人過其傍者至今莫不望其處而瞻禮焉

寶應錄終

# 古今說海

白蛇記

說淵五十五 別傳五十五

元和二年隴西李曠鹽鐵使遜之猶子也因調選次乘暇於長安市見一犢車侍婢數人於車中貨易李潛目車中因見白衣之姝綽約有絕代之色李子求問侍者曰娘子孀居袁氏之女前事李家今身衣李之服方將外除所以市此耳又詢可能再從人乎乃笑曰不知李子乃與出錢貨諸錦繡姝遂傳言云且貸錢買之請隨到莊嚴寺左側宅中相還不晚李子甚悅時日已晚遂逐犢車而行礙夜方至所止犢車入中門白衣姝一人下車侍者以帷擁之而入李下馬俄見一使者將榻而出云且坐坐畢侍者云今夜郎君豈暇領錢乎不然此有主人否且歸主人明晨不晚也李子曰乃今無交錢之志然此亦無主人何見隔之甚也侍者入白復出曰若無主人此豈不可但勿以疎漏爲誚也俄而侍者云屈郎君李子整衣而入見青服老女郎立於庭相見曰白衣之姨也中庭坐少頃白衣方出素裙粲然凝質皎若辭氣閒雅神仙不殊略序款曲翻然却入姨坐謝曰垂情與貨諸彩色比日來市者皆不知

之然所假殊荷深愧李子曰綵帛麤繆不足以奉佳人服御何苦指價乎答曰渠淺陋不足侍君子巾櫛然貧居有三數十千債負郎君儻不棄則願侍左右矣李子悅拜於侍側俯而圖之李子有貨易所先在近遂命所使取錢三十千須臾而至堂西間門着然而開飯食畢備皆在西間姨遂延李子入坐轉盼華煥女郎旋至命生拜姨而坐六七人具飯食畢命酒歡飲一住三日飲樂無所不至第四日姨云李郎且歸恐尙書怪遲後往來亦何難也李亦有歸志承命拜辭而出上馬僕人覺李子有腥臊氣異常遂歸宅問何處許日不見以他語對遂覺身重頭旋命被而寢先是婚鄭氏女在側云足下調官已成昨日過宮覓公不得其二兄替過宮已了李答以媿佩之辭俄而鄭兄至責以所往時李已漸覺恍忽祇對失次謂妻曰吾不起矣口雖語但覺被底身漸消盡揭被而視空注水而已唯有頭存家大驚懾呼從者訊之僕者具言其事及去尋舊宅所在乃空園有一皂莢樹樹上有十五千樹下有十五千餘無所見問彼處人云往往有巨白蛇在樹下更無別物姓袁者蓋以空園爲姓耳復一說元和中鳳翔節度李聽從子瑄在金吾參軍自永甯里出遊及安化門外乃

遇一車子通以銀粧頗極鮮麗駕以白牛從二女奴皆乘白馬衣服皆素而姿容宛媚瑄貴家子不知檢束卽隨之將暮焉二女奴曰郎君貴人所見莫非麗質某皆賤隸又皆羸軀不敢當公子厚意然車中幸有姝麗誠可畱意也瑄遂求女奴女奴乃馳馬傍車笑而顧曰郎君但隨行勿捨去某適已言矣瑄旣隨之聞其異香盈路日暮及奉誠園二女奴曰娘子住此之東今先去矣郎君且此迴翔某卽出奉迎耳車子旣入瑄乃駐馬於路側良久見一婢出門招手瑄乃下馬入坐於廳中但聞名香入鼻似非人世所有瑄遂令人馬入安邑里寄宿黃昏後方見一女子素衣年十五六姿艷若神仙瑄自喜之心所不能諭因畱止宿及明而出已見人馬在門外遂別而歸纔及家便覺腦疼斯須益甚至辰巳間腦裂而卒其家詢問奴僕昨夜所歷之處從者具述其事云郎君頗聞異香某輩所聞但蛇臊不可近舉家寃駭遽命僕人於昨夜所止之處覆驗之但見枯槐樹中有大蛇蟠屈之跡乃伐其樹發掘已失大蛇但有小蛇數條盡白皆殺之而歸

### 白蛇記



# 古今說海

## 巴西侯傳

說淵五十六 別傳五十六

吳郡張鋌成都人開元中以盧溪尉罷秩調選不得補於有司遂歸蜀行次巴西會日暮方促馬前去忽有一人自道左山逕中出拜而請曰吾君聞客暮無所止將欲奉邀命某以請願隨某去鋌因問曰爾君爲誰豈非太守見召乎曰非也乃巴西侯耳鋌卽隨之入山逕行約百步望見朱門甚高人物甚多甲士環衛雖侯伯家不如也又步數十乃至其所使者止鋌於門曰願先以白吾君客當伺焉入久之而出乃引鋌曰客且入矣鋌既入見一人立於堂上衣褐革之裘貌極異綺羅珠翠擁侍左右鋌趨而拜既拜其人揖鋌升階謂鋌曰吾乃巴西侯也居此數十年矣適知君暮無所止故輒奉邀幸少畱以盡歡鋌又拜以謝已而命開筵致酒其所玩用皆華麗珍具又令左右邀六雄將軍白額侯滄浪君又邀五豹將軍鉅鹿侯玄丘校尉且傳教曰今日貴客來願得盡歡宴故命奉請使者唯而去久之乃至前有六人皆黑衣轟然其狀曰六雄將軍巴西侯起而拜六雄將軍亦拜又一人衣錦衣戴白冠貌甚



猗猗曰白額侯也巴西侯又起而拜白額侯亦拜又一人衣蒼其質魁岸曰滄浪君也巴西侯又拜滄浪亦拜又一人被斑文衣似白額侯而稍小曰五豹將軍也巴西又拜五豹將軍亦拜又一人衣褐衣首有三角曰鉅鹿侯也巴西侯稱之又一人亦異狀類滄浪君曰玄丘校尉也巴西侯每揖之然後延坐巴西西南向坐鉅北向六雄白額滄浪處於東五豹鉅鹿玄丘處於西既坐飲酒命樂又美人十數歌者舞者絲竹既發窮極其妙白額侯酒酣顧謂鉅曰吾今尙未夜食君能爲吾致一飽邪鉅曰未卜君侯所以食者願教之白額侯曰君之軀可以飽吾腹亦何貴他味乎鉅懼悚然而退巴西侯曰無此理奈何宴席之上有忤貴客邪白額侯笑曰吾之言乃戲耳安有如是哉固不然也久之有告洞玄先生在門願謁白事言訖有一人被黑衣頭長而身甚廣其人拜巴西侯揖之與坐且問曰何謂而來乎對曰某善卜者也知君將有甚憂故輒奉白巴西侯曰所憂者何也曰席上人將有圖君今不除後必爲害願君詳之巴西侯怒曰吾歡宴方洽何處有怪焉命殺之其人曰用吾言皆得安不用吾言則吾死君亦死將若之何雖有後悔其可追乎巴西侯遂殺卜者致於堂下

時夜將半衆盡醉而皆臥於榻鏹亦假寐焉天將曉忽悸而寤見己身臥於大石龕中其中設繡帷服玩珠璣犀象有一巨猿狀如人醉臥於地蓋所謂巴西侯也又見巨熊臥於前者蓋所謂六雄將軍也又一虎頭白亦臥於前所謂白額侯也又一狼所謂滄浪君也又一文豹所謂五豹將軍也又一巨鹿一狐皆臥於前蓋所謂鉅鹿侯玄丘校尉也而俱冥然若醉狀又一龜形狀甚異死於龕前乃向所殺洞玄先生也鏹既見大驚卽出山逕馳告里中人里人相集得百數遂執弓挾矢入山中至其處猿忽驚而起且曰不廳洞玄先生言今日果如是矣遂圍其龕盡殺之其所陳器玩莫非珍麗乃具事以告太守先是人有持其金貝繒帛過此者俱無何而失且有年矣自後絕其患也

巴西侯傳終



# 古今說海

柳歸舜傳

說淵五十七 別傳五十七

吳興柳歸舜隋開皇九年自巴陵泛舟遇風吹至君山因維舟登岸尋小徑不覺行三四五里輿酣踰越溪澗不由徑路忽道傍有一大石表裏洞徹圓而坦平周匝六七畝其外盡生翠竹圓大如盞高百餘尺葉曳白雲森羅映天清風徐吹憂憂爲絲竹音石中又生一樹高百餘尺條幹偃陰爲五色翠葉如盤花徑尺餘色深碧蕊深紅異香成煙著物霏霏有鸚鵡數千丹嘴翠衣尾長二三尺翽翽其間相呼姓字音旨清越有名武遊郎者有名阿蘇兒者有名武仙郎者有名自在先生者有名踏蓮露者有名鳳凰臺者有名戴蟬兒者有名多花子者或有唱歌者曰吾此曲是漢武鉤弋夫人常所唱詞曰戴蟬兒分明傳與君王語建章殿裏未得歸朱箔金缸雙鳳舞名阿蘇兒者曰我憶得阿嬌深宮淚唱曰昔請司馬相如爲作長門賦徒使費百金君王終不顧又有誦司馬相如大人賦者吾初學賦時爲趙昭儀抽七寶釵橫鞭余痛實不徹今日誦得還是終身一藝名武遊郎者言余昔見漢武帝乘鬱金楫泛

積翠池自吹紫玉笛音韻朗暢帝意歡適李夫人歌以隨歌曰顧鄙賤奉恩私願吾君萬歲期又名武仙郎者問歸舜曰君何姓氏第幾歸舜曰姓柳第十二曰柳十二自何許來歸舜曰吾將至巴陵遭風泊舟興酣至此耳武仙郎曰柳十二官人偶因遭風得臻異境此所謂因病致妍耳然下官禽鳥不能致力生人爲足下轉達桂家三十娘子因遙呼曰阿春此間有客卽有紫雲數片自西南飛來去地丈餘雲氣漸散遂見珠樓翠幕重檻飛楹周匝石際一青衣自戶出年始十三四身衣珠翠顏甚姝美謂歸舜曰三十娘子傳語郎君貧居僻遠勞此檢校不知朝來食否請垂略坐以具蔬饌卽有捧水晶床出者歸舜再讓而坐阿春因呼鳳花臺鳥何不看客三十娘子以黃郎不在接對郎君汝若等閑似前度受捶有鸚鵡卽飛至曰吾乃鳳花臺也近有一篇君能聽乎歸舜曰平生所好實契所願鳳花臺乃曰吾時過蓬萊玉樓因有一章詩曰露接朝陽生海波翻水晶玉樓間寥廓天地相照明此時下棲止投跡依舊楹顧余復何忝自侍羣仙行歸舜曰麗則麗矣足下師乃誰人鳳花臺曰僕在左右一千餘歲杜蘭香教我眞錄東方朔授我祕訣漢武帝求太中大夫遂在石

渠署見揚雄王褒等賦頌始曉箴論王莽之亂方得還吳後爲朱然所得轉遺陸遜復見機雲制作方學綴篇行機雲被戮便至於此殊不知近日誰爲宗師歸舜曰薛道衡江總也因誦數篇示之鳳花臺曰近代非不靡麗殊少骨氣俄而阿春捧玉盤珍羞萬品目所不識甘香裂鼻飲食訖忽有二道士自空飛下顧見歸舜曰大難得與鸚鵡相對君非柳十二乎君船以風便索君甚急何不促回因投一尺綺曰以此掩眼卽去矣歸舜從之忽如身飛却墜以達舟所舟人欲發問之失歸舜已三日矣後却至此泊舟尋訪不復見也

柳歸舜傳終



# 古今說海

## 求心錄

說淵五十八 別傳五十八

乾元初會稽民有楊叟者家以資產豐贍聞於郡中一日叟將死臥而呻吟且僅數月叟有子曰宗素以孝行稱於里人迨其父病罄其產以求醫術後得陳生者究其脈曰是翁之病心也蓋以財產既多其心爲利所運故心神已離去其身非食生人心不可以補之而天下生人之心焉可致邪如是則非吾之所知也宗素既聞之以爲生心故莫可得之獨修浮圖氏法庶可以佑其疾卽召僧轉經命工圖鑄其像已而自齋食詣郡中佛寺飯僧一日因挈食去誤入一山逕中見山下有石龕龕有胡僧貌甚老既枯瘠衣褐毛縷成袈裟露坐於磐石上宗素以爲異人卽禮而問曰師何人也獨處窮谷以人跡不到之地爲家又無侍者不懼山野之獸有害於師乎不然是得釋氏之術者邪僧曰吾本是袁氏某祖居巴山其後子孫或在弋陽散遊諸山谷中盡能世修祖業爲林泉逸士極得吟嘯之趣人有好爲詩者多稱其善吟嘯於是稍聞於天下有孫氏亦族也則多遊豪貴之門亦以善談謔故又以之遊於市



肆間每一戲能使人獲其利焉獨吾好浮圖氏不悅塵俗棲心巖谷中不動而在此且有年矣常慕育利王割截體身及委身投崖以飼餓虎故吾啖橡栗飲流泉悵未有虎狼噬吾吾固甘之也宗素因告曰師真至人能舍其身而不顧將以飼山獸可謂義勇俱極矣雖然弟子父有疾已數月進而不瘳某夙夜憂迫計無所出有醫者云是心之病也非食生人之心固不可得而愈矣今師能棄身於豺虎以救其餒豈若舍命於人以惠其生乎願師詳之僧曰誠如是果吾之志也檀越爲父而求吾吾豈有不可之意且吾以身委於野獸曷若惠人之生乎然今日尙未食願致一飽而後死也宗素且喜且謝卽以所挈食致於僧前食之立盡乃曰吾既食矣當禮四方之聖然後奉教也於是整其衣出龕而禮禮東方已畢忽躍而騰上一高樹宗素以爲神通變化殆不可測俄召宗素厲聲而問曰檀越向者所求何也宗素曰願得生人心以療父疾僧曰檀越所願者吾已許焉今欲先設金剛經之奧義且欲聞乎宗素曰某素向浮圖氏今日獲遇吾師安敢不聽乎僧曰金剛經云過去心不可得見在心不可得未來心不可得檀越若要取吾心亦不可得矣言已忽跳躍大呼化爲

一猿而去宗素驚異惶駭而歸

求心錄終



# 古今說海

## 知命錄

說淵五十九 別傳五十九

吳全素蘇州人舉孝廉五上不第元和十二年寓居長安永興里十二月十三日夜既臥見二人白衣執簡若貢院引榜來召者全素曰禮闈引試分甲有期何煩夜引使者固邀不得已而下床隨行不覺過子城出開遠門二百步正北行有路闊二尺已來此外盡目深泥見丈夫婦人摔之者拽倒者扭枷者鎖身者連裾者僧者道者囊盛其頭者面縛者散驅行者數百輩皆行泥中獨全素行平路約數里入城郭見官府同列者千餘人軍吏佩刀者分部其人率五十人爲一引引過全素在第三引中其正衙有大殿當中設床几一人衣緋而坐左右立吏數十人衙吏點名便判付司獄者付磔獄者付鑿獄者付湯獄者付火獄者付案者聞其付獄者方悟身死見四十九人皆點付訖獨全素在因問其人曰當衙者何官曰判官也遂訴曰全素忝履儒道年祿未終不合死判官曰冥官案牘一一分明據籍帖追豈合妄訴全素曰審知年命未盡今請對驗命籍乃命取吳郡戶籍到檢得吳全素元和十三年明經

出身其後三年衣食亦無官祿判官曰人世三年纔同瞬息且無榮祿何必却回既去卽來徒煩案牘全素曰辭親五載得歸卽榮何況成名尙餘三載伏乞哀察判官曰任歸仍誠引者曰此人命薄宜令速去稍似延遲卽突明矣引者受命卽與同行出門外羨而泣者不可勝紀既出其城不復見泥矣復至開遠門二吏謂全素曰君命甚薄突明卽歸不得見判官之命乎我皆貧各惠錢五十萬卽無慮矣全素曰遠客又貧如何可致吏曰從母之夫居宣陽爲戶部吏者甚富一言可致也既同詣其家二吏不肯上堦令全素入告其家方食煎餅全素至燈前拱曰阿姨萬福不應又曰姨夫安和又不應乃以手籠燈滿堂皆闇姨夫曰何不拋少物夜食香物鬼神便合憐人全素旣憾其不應又目爲鬼神意頗忍之青衣有執食者其面正當因以手掌之應手而倒家人競來拔髮噴水呼喚良久方悟全素旣言情不得下堦問二吏吏曰固然君未還生非鬼而何鬼語而人不聞籠燈行掌誠足以駭之曰然則何以言事曰以吾唾塗人大門一家睡塗人中門門內人睡塗堂門滿堂人睡可以手承吾唾而塗之全素掬手二吏交唾逡巡掬手以塗堂門纔畢滿堂欠伸促去食器遂

入寢二吏曰君入去床三尺立言之慎勿近床以手搖動則魘不寢矣全素依其言言之其姨驚起泣謂夫曰全素晚來歸宿何忽致死今者見夢求錢言有所遺如何其夫曰憂念外甥偶爲熱夢何足遽信又寢又夢驚起而泣求紙於櫃適有二百幅乃令遽剪焚之火絕則千緡宛然在地矣二吏曰錢數多某固不能勝而君之力生人之力也可以盡舉請負以致寄之全素初以爲難試以兩手上承自肩挑之巍巍然極高其實甚輕乃引行寄介公廟主人者紫衣腰金勅吏受之寄畢二吏曰君之還生必矣且思便歸爲亦有所見邪今欲取一人送之受生能略觀否全素曰固所願也乃相引入西市絹行南盡人家燈火熒煌嗚嗚而泣數僧當門讀經香煙滿戶二吏不敢近乃從堂後簷上計當寢床有抽瓦折椽開一大穴穴中下視一老人氣息奄然相向而泣者周其床一吏出懷中繩大如指長二丈餘令全素安坐執之一頭垂於穴中誠全素曰吾尋取彼人人來當掣繩遂出繩下之而以右手掙老人左手掣繩全素遽掣出之拽於堂前以繩囚縛二吏更荷而出相顧曰何處有屠案最大其一曰布政坊十字街南王家案最大相與往焉既到投老人於案上脫衣纏身

更上推撲老人曰苦其聲感人全素曰有罪當刑此亦非法若無罪責何以苦之二吏曰訝君之間何遲也凡人有善功清德合生天堂者仙樂綵雲霓旌鶴駕來迎也某何以見之若有重罪及穢惡合墮地獄牛頭奇鬼鐵叉枷杻來取某又何以見之此老人無生天之福又無入地獄之罪雖能修身未離塵俗但潔其身靜無瑕穢既舍此身只合更受男子之身當其上計之時其母已孕此命既盡彼命合生今若不團撲令彼婦人何以能產又盡力揉撲實覺漸小須臾其形纔如拳大百骸九竅莫不依然於是依依提行踰子城大勝業坊西南下東回第二曲北壁入第一家其家復有燈火言語切切沙門三人當窻讀入陽經因此不敢逼直上堦見堂門斜掩一吏執老人投於堂中纔似到床新子已啼矣二吏曰事畢矣送君去又偕入永興里旅舍到寢房房內尙黑略無所見二吏自後乃推全素大呼曰吳全素若失足而墜既甦頭眩苦良久方定而街鼓動姨夫者自宣陽走馬來則已蘇矣其僕不知覺也乘肩輿憩於宣陽數日復故再由子城入勝業生男之家厯厯在眼自以明經中第不足爲榮思速侍親卜得行日或頭眩不果去或驢來脚損或雨雪連日或親故往

來因循之間遂逼試日入塲而過不復以舊日之望爲意俄而成名笑別長安而去  
乃知命當有成棄之不可時苟未會躁亦何爲舉此一端足可以誠其知進而不知  
退者

知命錄終





# 古今說海

## 山莊夜怪錄

說淵六十 別傳六十

大中年有甯苗秀才假大僚莊於南山下棟宇半隳墻垣又闕因夜風清月朗吟詠庭際俄聞叩門聲稱桃林斑特處士相訪苗啓門睹處士形質瓌瑋言詞廓落曰某田野之士力耕之徒向畎畝而辛勤與農夫而齊類巢居側近睹風月皎潔聞君吟諷故來奉謁苗曰某山居甚僻農具爲鄰蓬葦旣深輪蹄罕至幸此見訪頗慰羈懷願聞處士之業如何特曰某年少時兄弟競生頭角每讀春秋至穎考叔挾轅以走恨不得佐助其間讀史記至田單破燕之計恨不得奮擊其間讀東漢至光武新野之戰恨不得騰躍其間此三事快意俱不能逢但恨恨耳今則老倒又無嗣子空懷舐犢之悲耳又慕徐孺子弔郭林宗言曰生芻一束其人如玉其人如玉卽不敢當生芻一束堪令諷咏俄聞人叩關曰南山斑寅將軍奉謁苗遂延入氣貌嚴聳旨趣剛猛及二斑相見亦甚慰意寅曰老兄知得姓之根本否特曰昔吳太伯爲荆蠻斷髮文身因茲遂有斑姓寅曰老兄大妄殊不知根本且斑氏出自鬪穀於菟有文斑

之像因以命姓遠祖姑媿好好辭章大有稱於漢皆有傳於史其後英傑間生蟬聯不絕後漢有斑超立功萬里外封威遠侯某爲虎賁中郎將官在武班因有過竄於山林晝伏夜遊露跡隱形但偷生耳適聞松吹月高墻外閒步聞君吟詠因來追謁况遇當家尤增慰悅寅因覩碁局在床謂特曰願接老兄一局特遂忻然爲之良久未有勝負茵翫之教特一兩著寅曰主人莫是高手否茵曰若管中窺豹時見一斑兩斑寅笑曰大有微機眞一發兩豹遂傾茵壺請飲及罷局而飲數巡寅請備脯脩以送茵出鹿脯寅嚙決須臾而盡特卽不如茵詰曰何故不食特曰無上齒不能咀嚼故也數巡後二斑使酒作劇言語紛拏特曰弟倚爪牙之士而苦相凌邪寅曰老憑軾之士苦相詆何也特曰弟誇猛毅之軀若值人如卞莊子子當爲粉矣寅曰兄誇壯勇之力若值人如庖丁當其頭皮耳茵前有削脯刀長尺餘茵怒而言曰某有尺刀在是二客不得喧競但且飲酒勿喧觀二客懷悚久之特舉曹植詩曰萁在釜下燃豆在釜中泣此一聯甚不惡寅曰鄙詩云鷓鴣樹上鳴意在麻子地俱大笑茵曰無多言各請賦詩一章茵曰曉讀雲水靜夜吟山月高焉能履虎尾豈用學牛

乃寅繼之曰但得居林嘯焉能當路蹲渡河何所適終是怯劉琨特曰無非憐甯戚終是怯庖丁若遇龔爲守蹄蹻向北溟菌覽之曰大是奇才寅見菌稱特奇才大怒拂衣而起曰甯生何黨此輩自古只有斑馬之才豈有斑牛之才且我生三日便欲噉人此人况偷我姓氏但未能其語者蓋惡傷其類耳遂曰終不能搖尾於君門下乃長揖而去特亦怒曰古人重者白眉君今白額豈復有人延譽邪何相怒如斯特遂告辭及明視其門外唯虎跡牛蹤而已甯生方悟尋之數百步人家廢莊內有一老瘦牛臥而猶帶酒氣虎即入其山矣爾後更不居此而歸京矣

### 山莊夜怪錄終



# 古今說海

## 五真記

說淵六十一 別傳六十一

楊敬真號州闔鄉縣長壽鄉天仙村田家女也年十八適同村王清其夫貧力田楊氏奉箕帚供農婦之職甚謹夫族目之曰勤力新婦性沉靜不好戲笑有暇必灑掃靜室閉門閒坐雖隣婦拜之終不相往來生三男一女年二十四歲元和十二年五月十二日夜告其夫曰妾神識頗不安惡聞人語當於靜室甯之請君與兒女暫居異室其夫以田作困又保無他因以許之不問其故楊氏遂沐浴着新衣灑掃其室焚香閉戶而坐及明訝其起遲開門視之衣服委於床上若蟬蛻然身已去矣但覺異香滿屋其夫驚以告其父母共嘆之次隣人來曰昨夜夜半有天樂從西而來似若雲中下於君家奏樂久之稍稍上去合村皆聽之君家聞否而異香酷烈遍數十里村吏以告縣令李邯遣吏民遠近尋逐皆無踪跡因令不動其衣閉其戶以棘環之冀其或來也至十八日夜五更村人復聞雲中仙樂異香從東來復下王氏宅作樂久之而去王氏亦無聞者及明來視其門棘封如故房中彷彿若有人聲遽走告

令李邴親率僧道官吏共開其門則新婦者宛然在床矣但覺面目光芒有非常之色邴問曰向何所去今何所來對曰昨十五夜初有仙騎來曰夫人當上仙雲鶴卽到宜靜室以俟之遂求靜室至三更有仙樂綵仗霓旌絳節鸞鶴紛紜五雲來降入於房中執節者前曰夫人准籍合仙仙師使者來迎將會於西嶽於是仙童二人捧玉箱來獻箱中有奇服非綺非羅製若道人之衣珍華香潔不可名狀遂衣之畢樂作三闋青衣引白鶴來曰宜乘此初尙懼其危試乘之穩不可言飛起而五雲捧出綵仗霓旌次第前引至於華山雲臺峯峯上有盤石已有四女先在彼焉一人云姓馬宋州人一人姓徐幽州人一人姓郭荊州人一人姓夏青州人皆其夜成仙同會於此傍有一小仙曰並捨虛幻得證真仙今當定名宜有真字於是馬曰信真徐曰洪真郭曰修真夏曰守真其時五雲參差覆崖徧谷妙樂羅列間作於前五人相慶曰同生濁界並是凡身一旦翛然遂與塵隔今夕何夕歡會於斯宜各賦詩以導其意信真詩曰幾却澄煩思今身僅小成誓將雲外隱不向世間行洪真詩曰綽約離塵界從容上太清雲衣無綻日鶴駕沒遙程修真詩曰華嶽無三尺東瀛僅一杯入

雲騎綵鳳歌舞上蓬萊守真詩曰共作雲山侶俱辭世界塵靜思前日事拋却幾年身敬真亦繼詩曰人世徒紛擾其生似舜華誰言今夕裏俛首視雲霞旣而雕盤珍果名不可知妙樂鏗鏗響動崖谷俄而執節者請曰宜往蓬萊謁大仙伯五真曰大仙伯爲誰曰茅君也妓樂鸞鶴復次第前引東去倏忽間已到蓬萊其宮闕皆金銀花木樓殿皆非人世之制作大仙伯居金闕玉堂中侍衛甚嚴見五真喜曰來何晚邪飲以玉杯賜以金簡鳳文之衣玉華之冠配居蓬萊院四人者出敬真獨前曰王清父年高無人侍養請回侍其殘年王父去世然後從命誠不忍獨樂而忘王父也惟仙伯哀之仙伯曰敬真汝村一千年方出一仙人汝當其會無自墜其道因敕四真送至其家故得還也邯鄲問昔何修習曰村婦何知但性本慮靜聞卽凝神而坐不復俗慮得入胸中耳此性也非學也又問要去可否曰本無道術何以能去雲鶴來迎卽去不來亦無術可召於是遂謝絕其夫服黃冠邯鄲以狀聞州州聞廉使時崔尙書從按察陝輔延之舍於陝州紫極宮請王父於別室人不得升其階惟廉使從事及夫人之瞻拜者纔及階而已亦不得升廉使以聞召見舍於內殿虔誠訪道而無



以對罷之今見在陝州終歲不食時啗果實或飲酒三兩杯絕無所食但容色轉芳嫩耳

五真記終

# 古今說海

## 小金傳

說淵六十一 別傳六十二

貞元六年十月范陽盧頊家於錢唐妻弘農楊氏其姑王氏早歲出家隸邑之安養寺項宅於寺之北里有佳婢曰小金年可十五六頊家貧假食於郡內郭西堰堰去其宅數十步每令小金於堰主事常有一婦人不知何來年可四十餘著瑟瑟裙蓬髮曳漆履直詣小金坐自言姓朱第十二久之而去如是數日時天寒小金爇火以燎須臾婦人至顧見床下炭怒謂小金曰有炭而焚煙薰我何也舉足踏火火卽滅以手批小金小金絕倒於地小金有弟年可四五歲在傍大駭馳報於家家人至已失婦人而小金暝然如睡其身僵仆如束命巫人祀之釋然於是具陳其事居數日婦人至抱一物如狸狀而尖嘴捲尾尾類犬身斑似虎謂小金曰何不食我貓兒小金曰素無爲之奈何復批之小金又倒火亦撲滅童子奔歸以報家人至小金復暝然又祝之隨而愈自此不令之堰後數日令小金引船於寺迎外姑船至寺門外寺殿後有一塔小金忽見塔下有車馬朱紫甚盛竚立以觀之卽覺身不自制須臾車

馬出左右辟易小金遂倒見一紫衣人策馬問小金是何人旁有一人對答二人舉扶階上不令損紫衣者駐馬促後騎曰可速行冷落他筵饌小金問傍人曰行何適人曰過大雲寺寺主家耳須臾車馬過盡其院中人來方見小金倒於階上復驚異載歸祀醮之而醒是夕冬至除夜盧家方備粢盛之具見婦人鬼倏閃於戶牖之間以開不得入盧生以二虎目繫小金左右臂夜久家人怠寢婦人忽曳小金驚叫婦人怒曰作餅子何不啖我家人驚起小金乃醒而左臂失一虎目忽窻外朗言還你遂擲窻有聲燭之果得後數日視之帛裹乾茄子不復虎目矣冬至方且有女巫來坐話其事未畢而婦人來小金卽瞑然女巫甚懼方食遂挾一枚餠舖置戶限上祝之於時小金忽笑曰笑朱十二喫餠舖以兩手拒地合面於餠舖上吸之盧生以古鏡照之小金遂泣言朱十二母在鹽官縣若得一頓餠舖及顧船錢則不復來盧生如言遂訣別而去方欲焚錢財之時已見婦人背上負錢焚畢而去小金遂釋然爲聞者小金母先患風疾不能言忽然廚中應諾便入房切切然語出大門良久摠衣關步而入若人騎馬狀直至堂而拜曰花容起居其家大驚花容卽楊氏家舊婢死

來十餘年語聲行動酷似之乃問花容何得來答曰楊郎遣來傳語娘子別久好在楊郎盧生舅也要小金母子故遣取來盧生具傳懇辭以畱受語而出門久之復命曰楊郎見傳語切今不用也急作紙人代之依言剪人題其名字焚之又言楊郎在安養寺塔上與楊二郎雙陸又問楊二郎是何人答曰神人耳又有木下三郎亦在其中又問小金前見車馬何人曰此是精魅耳本是東隣吳家阿嫂朱氏平生苦毒罰作蛇身今在天竺寺楮樹中有穴久而能變化通靈故化作婦人又問既是蛇身如何得衣裳著答曰向某家塚中偷來又問前抱來者是何物言野狸遂辭去卽酌一杯令飲飲訖更請一杯與門前鑊八問鑊八是何人云是楊二郎下行官又問楊二郎出入如此人遇之皆禍否答曰如他楊二郎等神物出入如風如雨在虛中下視人如螻蟻然命衰者則自禍耳他亦無意焉言訖而去至門方醒醒後問之皆不知也後小金夜夢一老人騎大獅子獅子如文殊所乘毛彩奮迅不可視旁有二崑崙奴操轡老人謂小金曰吾聞爾被鬼物纏繞故萬里來救汝是衰厄之年故鬼點爾作客云以取錢應點而已渠亦自得錢汝若不值我來至四月當被作土戶汝則

不免死矣汝於某日拾得繡佛子否小金曰然曰汝看此樣繡取七軀佛子七口幡子言訖又曰作八口吾誤言耳又截頭髮少許贖香以供養之其厄則除矣小金曰受教矣今苦腰背痛不可忍慈悲爲除之老人曰易耳卽令崑崙奴向前令展手便於手掌摩指則如墨染指便於背上點二灸處小金方醒具說其事卽造佛及幡視背上信有二點處遂灸之背痛立愈盧瑛秉志剛直不信其事又罵之曰烏有聖賢來救一婢此必是鬼耳其夜又夢老人曰吾哀爾疾危是以來救汝愚郎主却喚我作鬼魅耶吾亦不計此事汝至四月必作土戶然至三月末當須出杭州界以避之矣夫鬼神所部州縣各異亦猶人之有逃戶小金曰於餘杭可乎老人曰餘杭亦杭州耳何益也又曰嘉興可乎曰可老人曰汝於嘉興投誰家答曰某家有親欲投之老人曰其家有喪汝今避鬼還投鬼家何益也凡喪家有靈筵神道交通他則知汝所在汝投吉人家則可矣又臨發時脫汝所愛惜衣一事剪去身畱領縫襟帶餘處盡去之縛一草人衣之著宅之陰闇處汝則易衣而潛去也小金曰諾賢聖前度灸背當時獲愈今尙苦腰痛老人曰吾前不除爾腰者令爾知有我耳汝今欲除之邪

復於崑崙手掌中研墨點腰間一處而去寤而驗之信有點跡便灸之又瘥其後婦人亦不來矣至三月盡如言潛之嘉興自後無事

小金傳終



# 古今說海

## 林靈素傳

說淵六十二別傳六十三

林靈素初名靈噩字歲昌家世寒微慕遠遊至蜀從趙昇道人數載趙卒得其書秘藏之由是善妖術輔以五雷法往來宿亳淮泗間乞食諸寺僧多厭之政和三年至京師寓東太乙宮徽宗夢赴東華帝君召遊神霄宮覺而異之勅道錄徐知常訪神霄事迹知常素不曉告假或告曰道堂有溫州林道士累言神霄亦作神霄詩題壁間知常得之大驚以聞召見上問有何術對曰臣上知天宮中識人間下知地府上視靈噩風貌如舊識賜名靈素號金門羽客通真達靈玄妙先生賜金牌無時入內五年築通真宮以居之時宮禁多怪命靈素治之埋鐵簡長九尺於地是怪遂絕因建寶籙宮太乙西宮建仁濟亭施符水開神霄寶籙壇詔天下宮觀改爲神霄玉清萬壽宮無觀者以寺充仍設長生大帝君青華大帝君像上自稱教主道君皇帝皆靈素所建也靈素被旨修道書改正諸經醮儀校丹經靈篇刪修注解每遇初七升座講聽講皆宰執百官三衙親王中貴士庶觀者如堵講說三洞道經京師士民始



化奉道矣靈素爲闕不一上每以聰明神仙呼之御筆賜玉真教主神霄凝神殿侍宸立兩府班上上思明達后欲見之靈素復爲葉靜張致太香之術上尤異之謂靈素曰朕昔到青華帝君處獲言改除魔髡何謂也靈素遂縱言釋教害道今雖不可滅合與改正將佛刹改爲宮觀釋伽改爲天尊菩薩改爲大士羅漢改尊者和尚改德士皆雷髮頂冠執簡有旨依奏皇太子上殿爭之令胡僧立藏十二人并五臺僧二人道堅等與靈素鬪法僧不勝情願戴冠執簡太子乞贖僧罪有旨胡僧放道堅係中國人送開封府刺面決配於開寶寺前令衆明年京師大旱命靈素祈雨未應蔡京奏其妄上密召靈素曰朕諸事一聽卿且與祈三日大雨以塞大臣之謗靈素請急召建昌軍南豐道士王文卿乃神霄甲子之臣兼雨部與之同告上帝文卿既至執簡勅水果得雨三日上大喜賜文卿神霄凝神殿侍宸靈素眷倚益隆忽京城傳呂洞賓訪靈素遂捨土燒香香氣直至禁中上遣人探問香氣自通真宮來上亟乘小車到宮見壁間有詩云捨土焚香事有因世間宜假不宜真太平無事張天覺四海閒遊呂洞賓京城印行繞街叫賣太子亦買數本進上上大震怒捐賞錢千緡

開封府捕之有太學齋僕王青告首是福州士人黃待聘令青賣送大理勘招待聘兄弟及外族爲僧行不喜改道故云有旨斬馬行街靈素知蔡京鄉人所爲上表乞歸本貫詔不允通眞有一室靈素入靜之所常封鎖雖駕來亦不入京遣人廉得有黃羅大帳金龍朱紅椅卓金龍香爐京具奏請上親往臣當從駕上幸通眞宮引京至開鎖同入無一物粉壁明窻而已京皇恐待罪宣和元年三月京師大水臨城上令中貴同靈素登城治水敕之水勢不退回奏臣非不能治水一者是乃天道二者水自太子而得但令太子拜之可信也遂遣太子登城賜御香設四拜水退四丈是夜水退盡京城之民皆仰太子聖德靈素遂上表乞骸骨不允秋九月全臺上言靈素妄議遷都妖惑聖聽改除釋教毀謗大臣靈素即時攜衣被行出宮十一月與宮祠溫州居住二年靈素一日攜所上表見大守閻丘顓乞與繳進及與州官親黨訣別而卒生前自下墳於城南山命其隨行弟子皇城使張如晦可掘穴深五丈見龜蛇便下棺旣掘不見龜蛇而深不可視乃葬焉靖康初遣使監溫州伐墓不知所跡但見亂石縱橫強進多死遂已此耿延禧所作靈素傳也靈素本末世不知其全故

著之今溫州天喜宮有御題云太中大夫冲和殿侍宸金門羽客通真達靈元妙先生在京神霄玉清萬壽宮管轄提舉通真宮林靈素

宋趙與時撰

林靈素傳終

# 古今說海

## 海陵三仙傳

### 說淵六十四

別傳六十四

徐神翁

徐神翁名守信海陵人也生六七歲始能言父隸衙籍少孤無以自給年十九歲役於天慶觀常持一簞供灑掃盡力煩辱之事嘉祐四年天台道士余元吉來遊示惡疾過者面之公獨事之無倦忽於溺器得丹沙餌之元吉委化公喪之以師禮丐歛具於海安徐氏葬之日徐見公來謝甫出戶取金贈之相望數步而追莫及實未嘗出也自是常放言嘯歌默誦道書絕飲食至數日然供役未始乏事茹蔬取黃葉者自食曰此先生菜也春白粲奉衆別貯粃稗與丐士同食治平中有客自蜀來號黑道人每至觀獨與公語既去謂逆旅人曰吾無以謝爾令爾邸暑無蚊耳已而信然會糧竭道正唐日嚴晨命公督租於遠郊既往矣晡時見三清殿後枕簟臥者公也怪而問之公曰來早米自至詰旦果然唐謂田丁爾自運至甚善皆笑曰徐二翁終日程督不少休何謂自運至也日嚴大驚始命名置弟子籍熙甯九年以守金寶牌

恩度爲道士公笑曰我只解掃地不事冠冕短褐力役如故素不問書忽作楷字假度人經語爲人言禍福有謁而不見者有自往神遇者有不施而求者有施而不受者若怒罵戲笑無非休咎所寓或薄暮歛殿堂籍香紙肆筆書置几間明日來者取而授之一不經意悉酌所問紙盡而人亦絕元豐中徐州獲妖人辭連淮上發運使蔣穎叔疑於公就見曰爾徐二翁邪曰然知道乎不知解何事解喫飯日可幾米飽便住茹葷乎茹葷由此不疑公素蔬糲半歲前忽嗜鮮肥亦勸道流食至是乃省穎叔問我何如人也對曰宜省刑艸然而怒公自捫背曰癰痛不能語穎叔再拜曰經云神公受命普掃不祥其公之謂矣因呼神公故神公之名布天下穎叔背有疣盛怒則裂而內楚至不能言他人莫知也寢室附廚側因爲關堂榜之曰守雌他日獨坐有憂憤之色俄穎叔來不得見竟日不出戶左右問之公曰藥叉羅刹五百人生於世間亂且至矣憲使范鏗問公有夢否曰自不受道正庸錢不復作夢江陰劉谷與公語於竈下藉葦而寢未旦光輝如日谷驚躍而起見公坐哆口瞪目聞空中語曰徐禧入蕃直立死呂惠卿食枸杞夾子是時禧圖西邊呂持母服皆谷所善者五

年禧有永樂之敗呂常修敬端朝冠以拜公平視自若顧曰善守善守果黜知單州相繼竄責至紹聖甲戌而還始悟枸杞之讖且以善守爲戒也七年郡貢士謁行示字皆從火果貢院火王介甫居金陵求書示勅舒王三字而勅字不全且曰勅不須用人也未幾薨政和中追封王爵八年東坡先生起知登州來謁書來王守三字問學道之要曰毋作官卽好東坡領之至登召還泊守揚州馳書問方來公不書至南遷遣子過來亦不見繼徙惠過海矣子由謂吾兄信其言而不能用于子由續溪寓訊求字書曰運當減度身經太陰及慙侍從至門下侍郎實佐佑垂簾政元祐未出知袁州遣使問之書曰十遍轉經福德立降告其使曰過去十見在十子由聞之曰日者謂予戍運多福西運多厄豈謂是乎未至袁遷嶺表幾十年而復駙馬都尉張敦禮圖公像以進奏賜紫衣號圓通大師公不受公書字示人來者日衆主觀者因爲修造計置積以受金錢月吉起鑰間有端正非函隙可投者知出神所得也江都姚叟見持帚扣門者曰我徐二翁也有帚在汝園中隨指見叢竹如帚狀往視已失其人因率衆來訪三清殿他郡助役者皆曰見先生行化吾里九年四月公在寢旬

日或問之曰改元則出是月改紹聖郡人問鄉舉曰陸侍郎至滿城著綠陸農師來守郡次舉何昌言榜登科者甚衆三年郡大疫公扁戶六日郡人數百請之出曰作緣事故爾疫者飲呪水皆愈居數月淮陽人獻紫花石柱四初淮陽有山而石頑不適用有老父謂常姓者曰山有紫錦石可取爲柱施泰州天慶觀言訖不見試鑿之果紫錦文也柱成道海來值大風雨舟師拱而慄霧電中有物擊舟行甚駛一宿達海門泊至公迎勞曰驚怖不易不然不如此速也山陽楊生家聞異香見老父持帚入門傍有識者揖之遂隱遺椽於其庭生攜以至視三官殿柱杪亡一椽卽所遺者公曰欲新此殿乃施錢數十萬農師除海州告別公曰菜又貴也自海移蔡召入爲右丞無爲湯氏繪公像奉供公見夢乞其孫女出家覺語其妻秦秦惡之他日女死秦投像於江會疫廢其左臂湯請見公數之曰爾棄我江至長蘆乃濟湯慙負請死繼潭商至公笑曰謝汝相救商袖出像云得之長蘆江中哲宗未立元子中宮遣寺人致禮以問書今日吉人蓋徽廟諱也元符中鹽城時叟有請告曰爾亟歸九月中有道者來宜善待仍布施至期暴客夜集其門時悟出迎設酒殺金帛慰遣遂免陵

暴三年上元張燈前二日公以杖擊之盡數日哲廟遺詔至崇甯二年八月忽於殿  
墀望闕致敬壬申詔曰朕聞皇帝問道於廣成放勳往見乎姑射蓋惟有道之主能  
遵全德之人以爾體性抱神深不可測心通夙慧澹泊無爲不出戶庭四方宗仰宜  
隆褒命益顯眞風亟其來思毋執謙退可特賜號虛靜冲和先生令運使許彥致禮  
敦遣赴闕至京師館於上清儲祥宮之道院屢召入常服白紵元都衫華陽巾麻屨  
大條輿上從容言不替俚語每有忠規語祕弗傳也許肩輿歷嬪御閣投金珠盈其  
懷公解帶委於地而不受嘗小遺殿上人止之公弗顧三年乞歸會二月二十六日  
公誕日降香設千道齋賜五嶽金冠象簡密雲銷金上清服詔畫像二命親書生身  
受度等語四年八月賜勅書令發運使胡師文禮遣赴闕既至會解池水溢詔問之  
對曰業龍爲害惟天師可治召張繼先至投以鐵符龍震死而鹽復五年告歸大觀  
元年許大方攝郡事寫公眞求贊書曰身色不自在猶如脆瓦坯色盡還歸土神移  
別受胎籍如空裏月輪轉幾千回掉頭不識面元作阿誰來公詩頌不常作而援筆  
立就略無停思二月甲子出門望西北稽首大方問之公曰我欲去矣大方曰欲觀



邪遂以聞是日詔建仙源萬壽宮及有召命外庭未知也行日過闔闔謂觀者曰二翁不來以蔡京素敬事公因設食公取菜覆於地問終身曰東明及將死於潭之境趣就僧舍問其處曰東明寺也是歲令侍童理髮或旬日不止問其故笑而不言二年正月默坐不飲食至六旬時云世上悠悠不如歸休三茅劉混康亦召至公曰劉先生去我亦去矣四月丁酉劉先生解化二十日庚子上清知宮晨夢人叱云起起天帝召神公亟起問訊無恙也日暮公擎手叩齒四顧長揖已曲左肱而臥白氣自頂出西北去空中聞鶴唳公逝矣壽七十有六值歲早熟氣已蘊隆七日而斂四體可屈仰如生異香達於宮外上聞駭嘆久之贈大中大夫委內侍劉愛等視喪歸本部給葬用四品禮九月庚申葬城東響林原宣和中建昇真觀以奉祀初老農錢甲每見公呼鄰舍泊卜葬惟響林兆吉而未合制度東畛卽錢氏也錢悟舉地以獻公三召至闕以恩度弟子三十八人賜紫及師名甚衆官親族二人再賜父顯宣教郎母張蓬萊郡君所生李永嘉郡君奏建妙眞觀度劉崇仙張貧女爲女冠二人者常至觀獻果實公取二果噓而與食遂辟穀容色如少女也公初修觀每日有大施主

至崇甯末以片紙授張崇真書仙源萬壽踰年改建是宮公每行廊廡間必擊柱歎息如有所恨者泊仙去上勅有司促成新宮至紹興辛亥火於兵無子遺矣公再召後年七十餘灑掃淨穢無一日廢郡人家有圖像事之事無細大咨而後行向化遷行不敢萌非心有過必憚見每戒人曰修福不如避罪廣求不如儉用若服餌求神仙不死術者尤不取所聞人不可備舉至驗於數十年後非特知來而已皆隨根器以示誨誘大要使人知賦分有定而乘陰得以避就善惡可以消長一見卽書或示以言隱而顯簡而盡其以字假借離合增損及摘經中語首尾以告雖巧者注思不能到也其徒之四方者預求公字置像前俾來者射取無異親見凡有隱惡者見之必摘發使悔宿州陳生致禮虔甚公酌水使飲至於三辭曰不可強矣叱之曰汝不能此河中人奈何陳進穎錯愕不能對遂入道蓋嘗利人之財溺而不救也或欲詰盜聞所亡幾何曰三十千公怒罵曰竊三十千汝以爲盜乎三十年後有朝服爲盜者矣其因事警世類如此小校濮眞病痿數人掖而前公杖掖者走又杖眞眞不覺投杖而逃錢媪至公勞苦之媪曰髮白奈何公手拂其鬢皆變髮黑陳護女疾公兩

嚙其頸復欲嚙女啼而走公曰冤不可解也是夕縊死視之其繩三股斷其二而一存焉在觀應酬無虛時而神遊萬里之外無所不至有同日見者或非雅素夢授藥愈其疾他時望見叙舊其所夢乃公也遇齋帑空無時攜數百錢畀主首市蔬廝輩意積蹙闖亡入戶忽有盃水在地踐之而仆亟起振袂公儼然坐榻上形解後刻檀像於虛靜庵政和八年九月辛卯目有神光仍墮淚食頃乃止識者喻焉今禱於祠者探籌以代公語無不契合祈暘雨若響答雖亡猶存云

周處士

周處士名恪字執禮海陵人贈工部侍郎敬述五世孫和州法曹定國之子也元祐初再舉進士下第頗鬱鬱不得志既壯不娶嘗從郡學釋奠方坐以待事忽大呼仆地不知人閱四日而蘇問之云吾誦老子書至谷神不死若有人昇坐榻行數步吾駭而呼不覺其仆且久矣因取儒衣書焚之曰誤我此生者非汝也邪自此動靜顛異人直以爲狂耳先是徐神公語人云周家門前石生青毛當得仙矣已而果然人始敬之家武烈帝祠側未嘗遠遊忽有老農負瓦木爲葺精廬日向病亟賴先生至

以良藥起死乃知其出神也族叔注爲推官常呼曰朝議後階逼卿監不求改官者十五年壽踰八十蔡卞守揚州遣使遺酒旬日不授報書賓至命酒寒酌曰喫個冷揚州使來請書問太尉面目端正乎使反命則一夕病風口目斜矣州士掾吳令璋告別迎呼相公令璋心獨喜自負旣從調乃相州工曹耳宣和中屢召不起謝使者曰吾太平衰末之人也蔡京嘗奉書且俾大漕與郡守勸駕先生臥不啟戶而危言譙京不肯就駕朝廷知不可致乃止復詔曰朕躬妙道以宰制萬有旌達士以表迪羣倫庶幾清淨之風丕變澆漓之俗爾精微自得瀉白不踰守虛澹以爲常損紛華而無累宜加美號以示恩休可特賜號守靜處士視朝奉大夫仍賜五品服先生服命服常自號赤局右僕射燕服必衫帽破敝亦不修飾自贊曰周四十五衣破不補土木形骸神氣所聚四十五其行第也獨處一室臥起方丈間食酒肉如平時而無更衣之所畜一白鼠或去或來飲食同之賓至以水酌茗或擷屋苦煮水以啜其甘如飴親族相率攜酒殺以謁先生曰何故無某物對曰無是曰物在某處皆相視而笑不能隱先生音聲如鐘不以詞色假人皆望而畏之行有負雖高爵重位一見叱

罵不少卹故鮮有見者建炎二年三月戊戌裴淵陷城殺掠焚蕩民死什七八先生於是且七十矣攘袂詬賊一卒擊其首流血污衣先生曰恪血恪血不得洗須臾擊者至前嘔血死是歲不飲食歷數旬無疾側臥而化目不瞑神光射人燁如也初發殯重莫能勝漸輕若虛器然略約兩夫荷之初元祐中有陳豆豆者不知何許人披方毯無他服冬夏不易行丐於市郡人朱醫見其死瘞之矣歷四十年復至朱識之始以爲異人也居福田院攜小籃貯書卷見可人卽付與得錢物復施丐者人呼陳毯被嘗與唐道人謁先生笑語竟日所言他人莫能解也宣和末示化葬神公之西先生與唐道人相繼同域號三仙墳焉

唐先生

唐先生名甘弼海陵人爲郡小吏廉恪無他伎一日晨出若有所遇者忽裂巾毀屨解衣濡水滌橋裸程褻語見者遭慢罵家人以爲狂圍於別室悉毀臥具爲坎穿寢處其間歲餘其母哀而縱之冬夏一布襦僅蔽膝負敝衣於左肩蓬首胡髻垢面跣足常以指按其頰彷徨井閭中人呼唐九郎或發語于休咎人始異之稍就占訊喜

怒語默無不驗凡飲食或捐半於地或委溝渠而食其餘得炊餅漬渠泥啗之得酒或覆於几又祭之地復收飲無少損也所臨列肆是日必大獲競欲延致有以禮招之而弗屑者旗亭間以飲食爲博徒者數負不自活乞憐於先生或與之錢以爲博資則終日勝酤釀欲成而敗先生至襲下索飲釀者曰是不佳當別酌以獻不從漉而飲之香味俱變未竟日而售常寓宿王氏米肆高廩上肆罵狂穢無所避其家婦子羞惡俟其他之竊相與誚詈先生不復往數日無所貿易頻悔謝乃復比舍火延其屋爇寢矣獨堅臥不動俄反風而火滅人家非常所游者亦憚其來也必有異晨至蔣氏舍排闥入婦寢取溺器翻衽席衣衾淋漓顧笑曰解了矣室中人頗怒旣而聞一婢自經系絕得不死建炎二年忽持甕自擊其頰俄裴淵潰卒至標掠無遺乃悟打頰者隱語打刦耳紹興元年語人曰上元夜觀燈時虜人陷城至上元日火仙源宮屋五百楹煨燼無餘矣張榮來據城聞其神異執於酤肆大雪中露坐方數尺獨無雪膚容不霑潤乃積雪丈餘穿洞穴埋其中彌日出之怡然也人問寇亂何時已邪曰直待見閻羅聞者憂之謂不可逃死無幾何有裨將李貴過城下號李

闍羅自是歲小休矣四年劉豫犯淮南郡守趙康直問之書曰十三日硬齊又問書曰十三日軟齊蓋僞齊始肆猖獗終大敗而去七年冬十一月大呼於市曰二十一日雪下二十二日唐倒皆不測其意至期大雪明日往河西張氏舍求附火潛抱薪自焚於隙屋張覺之體已灼爛索寢衣披之行至常所居米肆端坐手擷燔肉以食且以飼犬須臾而逝有田夫自斗門至中途遇其西行問先生安往日吾歸也入城既自焚矣住世六十餘歲葬嚮林原歲餘後有離商見先生於江西而蜀人亦見之於青城云

宣統元年七月出版

不許複製

藏版者

集成圖書公司

印刷所

上海南京路  
集成圖書公司

總發行所

上海棋盤街  
集成圖書公司

分發行所

北京 天津 漢口 廣東 山西  
集成圖書公司

經售處

各埠大書坊

古今說海全部計十二冊

定價大洋四元正



平來文委移

上海图书馆藏书



A541 212 0017 0130B

上海圖書館

12